

康南海自編年譜

始祖建元

兩宋時自兩雄珠璣里始遷於南海縣西樵山北之銀塘鄉又名蘇村

高祖輝

字文耀號炳堂嘉慶舉人誥封榮祿大夫廣西布政使邑志有傳

高祖妣

諱封太夫人

曾祖健昌

又名式鵬號雲衡誥封資政大夫福建按察使

曾祖妣

梁諱封太夫人

祖贊修 又名以乾 號述之 道光舉州人 升用

祖妣陳 誥封太恭人

父達初 字植謀 號少農 提舉銜 江西補用知縣

母氏勞 誥封宜人

廣東廣州府南海縣江浦司銀塘鄉民籍

咸豐八年戊午二月初五日 生於其鄉敦仁里老屋

中太宜人胎十一月而生時已有女兄二人長者孀  
矣祖父母望孫切矣於時連州公官欽州學正聞而  
欣喜錫名曰有欽在遠寄未及至伯祖知府公名之  
曰有為連州公有詩記之聞長孫有欽生久切孫  
誅望眼穿震雷未發異旻光澤將璋瓦猜三索忽報  
桑弧畫一乾畫省孤燈官獨冷畫香再世汝應延可

憐大母含朝露空話含飴慰九泉

時陳太恭人  
以先年十二月  
新喪

連州囑勿刻詩教違而亡今存之以記祖德

吾家有九世祖惟卿公為士人至於吾為廿一世凡

為士人十三世矣炳堂公為馮魚山編修老弟子又

與馮潛齋郎中為友講理學師道甚尊成就甚眾雲

衡公受家學嚴氣正性行已惠人德行踴躍尤篤守

呂新吾呻吟語劉念台人譜陳榕門五種遺規之學  
連州公傳何樸園員外之學而潛齋先生三傳弟子  
篤行懿德為官師皆有惠教欽州賓興館連州昭忠  
祠祀焉知縣公孝德仁厚從叔祖護廣西巡撫國器  
討賊於閩有功早世有為生時知縣公方居憂授徒  
於鄉吾家實以教授世其家

咸豐九年

己未

二歲

咸豐十年

庚申

三歲

九月三妹瓊琚生

咸豐十一年

辛酉

四歲

時已有知識伯祖教之公

抱余觀洋人鏡畫侍種芝藥儀公食及藥儀公喪時

老婢祿祿往送種芝公以布衣倡團禦賊有功於鄉

送者萬數仗極盛今猶髣髴

同治元年壬戌五歲諸父以余頗敏多提携教誦

唐人詩從伯父教諭葵仲公尤愛而教之於時能誦

唐詩數百首連州公見而喜外祖父省閏公極愛之

期以將來大器矣

是年知縣公出山從征於藍山二叔父介藩公統兵

於青蓮峽等處



同治二年

癸亥六歲

從番禺簡侶琴先生鳳儀讀

大學中庸論語并朱注孝經諸父課以屬對出柳成

繁應聲答以魚化龍義仲公玉璫之謂此子非池中

物賞給紙筆甚樂九月四妹順介生知縣公從征閩

甲

同治三年

甲子七歲

從簡先生學是歲連州公以

欽州學正俸滿升知縣不就改教授候缺歸知縣公  
從征閩中至克復嘉應還家

同治四年乙丑八歲連州公授徒於廣府學宮孝

弟祠學者將百人從授經焉歲暮從龔仲公學即

在孝弟祠後始學為文是時知縣公及諸叔父咸還

侍連州公館中趨翔庭訓至樂也誦書經奧者每次

能二篇教編輒能背記諸長老大譽之

同治五年丙寅九歲連州公任修南海縣志事居

南海學宮志局中今明倫堂也為從侍馬從陳鶴僑

先生授經於學宮中崔清獻祠又從梁舜門先生

修甲子聽講焉

乙丑之間友之中丞公克復浙閩兵事大定以新授

閔某假歸諸人咸從凱旋於時門中以從軍起家者  
甚衆阿大中郎封胡羯末父龍兄虎左文右武號稱  
至盛土木之工游宴之事棋詠之樂孫子嬉戲其間  
諸人愛其聰明多獲從焉始游西樵慕山林之盛連  
州公好游觀春秋佳日時從杖屨登鎮海樓五羊觀  
蒲澗寺授以詩文教以道義知識日開矣

據羅本改但原文以  
係先生有改正者

徐善伯

(10)

同	治	六	年	丁	卯	十	歲	連	州	公	借	補	連	州	訓	導	之	任	以
幼	不	能	從	還	鄉	復	從	簡	先	生	學	時	誦	經	將	畢	學	為	文
矣	六	月	十	三	日	幼	弟	廣	仁	生	廣	仁	字	也	於	時	連	州	公
命	名	曰	有	溥	時	知	縣	公	指	省	江	西	連	年	頻	擬	聽	鼓	而
病	咳	殊	甚	連	州	公	不	許	行	是	歲	家	居	為	多	先	公	素	慈
捧	杖	捧	函	抑	搔	隨	侍	延	香	老	屋	中	至	今	如	夢			

東華錄三字  
羅本無之

(11)

同	治	七	年	戊	辰	十	一	歲	正	月	二	十	日	知	縣	公	卒	侍	
疾	彌	留	跪	聆	遺	訓	諭	以	立	志	勉	學	教	以	孝	親	友	愛	姊
弟	追	思	音	容	淚	下	若	塵	當	時	執	喪	如	成	人	里	邨	顏	異
之	既	孤	三	月	遂	從	先	祖	於	連	州	官	舍	連	州	公	日	夜	摩
導	以	儒	先	高	義	文	學	條	理	始	覽	綱	鑑	而	知	古	今	次	觀
大	清	會	典	東	華	錄	而	知	掌	故	遂	讀	明	史	三	國	志	六	月

卷之五

為詩文皆成篇於時神鋒開豁好學敏銳日昃室闕  
執卷倚簷柱就光而讀夜或甲旦務盡卷帙先祖聞  
之戒今就寢猶篝燈如豆於帳中隱而讀書焉頻聞  
叩報知朝事知曾文正駁文忠左文襄之業而慷慨  
有遠志矣知縣公既逝家計驟絀僅用一婢老母  
寡居手挽幼弟與諸姊妹治井竈之事為生平未有

之勞焉。每家書來輒念劬勞，憂思不已。

同治八年己巳十二月，從連州公學於官舍。是時

歧嶷能指揮人事，與州中諸生接論文談事，禮容猶

然。五月，觀競渡，賦詩二十韻。州吏月金公稱為神童，

贈漆硯盤筆盒數事。州人屬目焉。輒從連州公游，諸

名勝如北山、奇石之奇，劉夢得畫石如樓之遠，大雲



岩之奧皆有賦詩學官舍旁為宋張南軒先生濯纓  
堂教一亭遺跡連州公官暇則談聖賢之學先正之  
風凡兩廡之賢哲寺觀之祖師儒流之大賢以若碑  
帖詩文中才名之士皆隨時指告童子狂妄於時動  
希古人某事輒自以為南軒某文輒自以為東坡某  
念輒自以為六祖邱長春矣俛接州中諸生大有霸

視之氣明史之外竟日雜覽群書官舍有二園桃柚  
葡萄梧桐桑椹紫微極盛讀倦則偃息園中或從先  
祖出游名勝為學之至樂時也時為制藝文援筆輒  
成但不好之不工也

同治九年庚午十三歲從侍連州官舍已而廣東

布政使王公凱泰聞先祖行望檄調還廣州辦積匪

七月從歸先祖以子不好八股文於時專責為此業  
 九月從陳蕃生先生學於省城西門外第三甫桃源  
 始遂都會睹繁麗日與友遨遊不暇學也

同治十年辛未十四歲還西樵之銀塘鄉從從叔

竹孫先生諱達節學為文時中丞公新築園林藏書

於澹如樓及二萬卷書樓中兩樓對峙中間亭沼花

羅本 有古松  
七株無俗名水  
松四字

(一) 羅本缺此

木頗盛有古檜七株俗名水松數百年物幽室曰七  
松軒導以飛橋為虹福台種芝公書最多度藏其間  
於時讀書園中縱觀說部集部昆弟聚學有詩酒之  
懽是年始就童子試七月仲姊逸紅嫁於羅氏未踰  
月姊婿羅銘三病歿哀哀寡婦遠賦未亡女兄甚才  
守節事母母非女兒不懽也生平無失言失色可謂

至德矣

同治十一年壬申十五歲在鄉從楊仁山先生學

壬子到省再試童子試不售於時專督責為八股小

題文性不好也但慕為素子才詩文時文亦仿焉仍

縱觀說部集部雜史中丞公有廣西布政使還宗族

宴游極盛兩年費日力於試事及八股進學最寡矣

同治十二年

癸酉十六歲

移學於靈洲山之象台

鄉仍從楊先生學為文中歲而散後還銀塘鄉從張

齊臣先生

諱公輔學為文時文體尚路德派最惡厭

之乃盡舍去連州公委羊城書院監院是歲頗奔走

時好覽經說史學考據書始得毛西河集讀之於時

益吐棄八股名為學文絕不一作請父極責大詰之

羅季僅去先祖前  
乃即一題援筆為  
十六小講

先祖前乃出君子有九思至忿思難一題援筆為十  
六小講各有警語連州公稱之乃不深責於是乃始  
稍從事八股至歲暮為社學課文一日成六藝其三  
名前皆魁之文百餘篇錄額十五名而六文無一見  
遺者詩有冠軍先祖乃大喜及新正開課復第一至  
是鄉人文譽洽美焉

同治十三年甲戌十七歲居鄉時出城侍先祖而  
張先生閱文焉既而從從叔竹孫先生學於時好為  
縱橫之文時時作詩興兄弟鄉先輩倡和又好摹仿  
古文然涉獵羣書為多始見瀛環志畧地球圖知萬  
國之故地球之理



呂拔湖亦任公  
師也

光緒元年乙亥十八歲侍先祖於城從呂拔湖先

生學文是時督責甚嚴專事八股一切學皆舍去但

還鄉則得披涉群書耳

光緒二年丙子十九歲是年應鄉試不售憤學業

之無成邑有大儒朱九江先生諱次琦號子襄者先

祖之畏友頻稱之者乃請從之學先生碩德高行博

極群書其品詣學術在涑水東萊之間與國朝亭林  
船山為近而德器過之嘗為襄陵知縣百九十日惠  
政大行縣人祀焉棄官歸講學於邑之禮山三十年  
累召不出以諍學躬行薦授五品卿先生壁立萬仞  
而其學平實敦大皆出躬行之餘以求世俗汙特重  
氣節而主濟人經世不為無用之空談高論其教學

者之恒言則曰四行五學四行者敦行孝弟崇尚名  
節變化氣質檢攝威儀五學則經學文學掌故之學  
性理之學詞章之學也先生動止有法進退有度強  
記博聞每議一事論一學貫串今故能舉其詞發先  
聖大道之本舉修己愛人之義掃去漢宋之門戶而  
歸宗於孔子於時捧手受教乃如旅人之得宿盲者

之觀明乃洗心絕欲一意歸依以聖賢為必可期以  
群書為三十歲前必可盡讀以一身為必能有立以  
天下為必可為從此謝絕科舉之文士芥富貴之事  
超然立於羣倫之表與古賢豪君子為厚信乎大賢  
之能起人也藉非生近其時居近其地烏能早親炙  
之哉即從先生學未明而起夜分乃寢日讀宋儒書

及經說小學史學掌故詞章兼綜而並奮日讀書以  
寸記甫入學舍先生試五代史史裁論乃考羣書以  
史通體為之得二十餘頁先生睹之謂該博雅洽此  
是著成一書非復一文矣乃知著書之不難古人去  
我不遠蓋自得自信於時讀錢辛楣全集趙甌北十  
一史劄記日知錄困學紀聞遂覺浩然通關議論宏

起又未嘗學駢文讀史通愛其文體試為之先生遂  
許可又自以為文章易作通峭不難蓋余家小有藏  
書久好涉獵讀書甚多但無門徑及一聞先生之說  
與同學簡君竹居名朝亮胡君少愷名景棠目上下  
其議論即渙然融釋貫串而疇昔雜博之學皆為有  
用於是偶然自負於眾以不朽之業是冬十二月張

(20)

安人歸余俗例有入室戲新婦者余守禮拒之頗失  
諸親友惟以義不欲也

光緒三年丁丑二十歲在九江禮山草堂從朱先

生學四月三妹適西城岡鄉游志桐湖琴五月連州

公以連州水災及於難吾少孤自八歲依於大父飲

食我茹耳提面命皆大父為之親侍十餘年聞而哀  
數三日水漿不入口百日内食鹽菜及從父扶掖達  
既卒哭而葬於象岡以堪輿家言即殯而不下窆也  
即停山上與諸父結苦廬棺前縗經白衣不去身不  
肉食終是歲於時讀喪禮因致三禮之學造次皆守  
禮法古嚴肅儼恪一步不踰人咸迂笑之久之宗族



鄉黨莫不敬憚焉少年剛毅執守太過多如此是冬

葬連州公

光緒四年戊寅二十一歲在九江禮山草堂從九

江先生學大肆力於群書攻周禮爾雅說文冰經之

學楚詞漢書文選杜詩徐原文皆能背誦九江先生

提獎范氏後漢書之風俗氣節故尤致力焉先生精  
於古文不取相城而上言秦漢因從學文而及周秦  
諸子先生甚稱韓昌黎之文因取韓柳集讀而學之  
亦還有焉時讀子書知道術因而請於先生謂昌黎  
道術淺薄以至宋明國朝文章大家鉅名採其實際  
皆空疏無有竊謂言道當如莊荀言治當如管韓即

素問言醫亦成一體。若如昌黎不過為文工於抑揚  
演灝。但能言耳。於道無與。即原道亦極膚淺。而浪有  
大名。千年來文家頡頏。作氣勢自負。實無有知道者。  
先生素方嚴。乃笑責其狂。自初見時。諄諄戒吾傲。從  
此折節焉。然同學漸駭其不遜。至秋冬時。四庫要書  
大義畧知其概。以司理故。紙堆中泊其靈明。漸厭之。

日有新思。思考據家著書滿家。如戴東原。究復何用。  
因棄之。而私心好求安心立命之所。忽絕學捐書。閉  
戶謝友朋。靜坐養心。同學大怪之。以先生尚躬行。惡  
禪學。無有為之者。靜坐時。忽見天地萬物皆我一體。  
大放光明。自以為聖人。則欣喜而笑。忽思蒼生困苦。  
則悶然而哭。忽思有親不事。何學為。則即束裝歸廬。

先墓上同門見歌哭無常以為狂而有心疾矣至冬  
辭九江先生決歸靜坐焉此楞嚴所謂飛魔入心求  
道迫切未有歸依之時多如此是冬十二月二十  
一日長女同薇生

光緒五年己卯二十二歲以西廬山水幽勝可習

靜正月遂入熊山居白雲洞專誦道佛之書養神明  
素渣滓時或嘯歌為詩文徘徊散髮枕臥石窻瀑泉  
之間席芳草臨清流修柯遮雲清泉滿聽常夜坐弥  
月不睡恣意游思天上人間極苦極樂皆現身試之  
始則諸魔雜沓繼則諸夢皆息神明超勝欣然自得  
習五勝道見身外有我又令我入身中視身如骸視

人如冢既而以事出城遂斷此學在兩焦山時嘗註  
老子後大惡之棄去於時先祖棄養頗能自主謝絕  
時文並不就試秋間叔父督責甚至令就鄉試乃至  
斷其資糧於是還鄉居於二萬卷書樓及澹如樓中  
或養心或讀書超然物表居焦山時編修張廷秋先  
生諱鼎華與朝士四五人來游焦山張君素以文學

有盛名於京師者至是見之相與議論不合則大聲  
呵詆拂衣而去然張君盛稱之語人曰來西樵但見  
一土山惟見一異人自是粵中士夫咸知余而震驚  
之吾感其雅量貽書予之張君盛譽謂粵人無此文  
由是訂交焉吾故未嘗學為駢文但讀六朝史熟有  
能之然不自知其工也自是來城訪張君談則竟夕



甲旦盡知京朝風氣近時人才及各種新書道咸同  
三朝掌故皆得咨訪焉張君聰明絕世強記過人神  
鋒朗照談詞如雲吾自師九江先生而得聞聖賢大  
道之緒自友延秋先生而得博中原文獻之傳嘗有  
詩懷之曰南望九江北京國拊心知己總酸辛實錄  
也於時舍棄考据帖括之學專意養心既念民生艱

難天與我聰明才力拯救之乃哀物悼世以經營天  
下為志則時時取周禮王制太平經國書文獻通考  
經世文編天下郡國利病全書讀史方輿紀要緯劃  
之俛讀仰思筆記皆經緯世宙之言既而得西國近  
事彙編李環游地球新錄及西書數種覽之薄游  
香港覽西人宮室之環麗道路之整潔巡捕之嚴密

乃始知西人治國有法度不得以古舊之夷狄視之  
乃復閱海國圖誌瀛寰志畧等書購地球圖新收西  
學之書為講西學之基矣

光緒六年庚辰二十三歲居鄉授諸弟有銘有溥

有霖讀經以涉群書讀經史為日課時生計日然不

能出游不能讀書乃至無筆墨但事太宜人課諸弟  
戲影窮巷用力說文兼作篆隸從事皇清經解暇則  
玩心神明頗多筆記而有述作 冬十二月廿四日

次女同璧生是歲治經及公羊著何氏糾譌專攻何  
劬公者既而自悟其非焚去是歲四妹適壩心譚汝  
堅

光緒七年辛巳二十四歲讀書鄉園跼步不出又  
無賓友日讀唐宋史為課補溫北魏宋齊梁書兼涉  
叢書傳記經解讀宋儒之書若正誼堂集朱子全集  
尤多苦身力行以明儒吳康齋之堅苦為法以白沙  
之瀟灑自命以亭林之經濟為學於是棄駢散文不  
復從事焉園林日涉閑其無人長齋獨坐看花洗竹

至於迴塘魚靜長橋月落徘徊遠家猶復篝燈點書  
不已以此為恒自一飯外陪老母色笑即出園舍七  
月有一乞巧文有歌去來之作猶覺情親誦招隱之  
詩惟憂句盡因見當時之風尚焉是時讀書日以寸  
計專精涉獵兼而行之是年讀書最多久坐積勞至  
七月臂起核刺割之不效十月出城就醫焉後再割

不愈至今流水吾精力之虧自此始矣  
是春陳慶  
笙來訪自是往還論學

光緒八年壬午二十五歲  
九江先生卒奔視與諸

子營喪視義馬吾故夙事三禮者故與簡君竹居議  
之為多  
讀連金元明史及東華錄以為日課五月

順天鄉試借此游京師謁太學叩石鼓瞻宮闕購碑  
刻講金石之學時崔藻典編修甚數余將掃室館我  
既罷還游揚州鎮江登平山堂泛舟金焦而歸道經  
上海之繁盛益知西人治術之有本舟車行路大購  
西書以歸講求焉十一月還家自是大講西學始盡  
釋故見



光緒九年癸未二十六歲讀東華錄大清會典則

例十朝聖訓及國朝掌故書購萬國公報大政西學

書聲光化電重學及各國史志諸人游記暨涉焉於

時欲輯萬國文獻通攷並及樂律韻學地圖學是時

絕意試事專精問學新識深思妙悟精理使讀仰思

日新大進何易一來館之於家易一聰明過人能深思妙悟至是皆館於我十二月次女同璧生

中

國裏足之風千年矣折骨傷筋害人生理謬俗流傳固閉已甚吾鄉無有不裏足者亦以不裏足則人賤為妾婢富貴家無取之者也吾時堅不為同薇裏足族人無不駭竒疑笑而為我慮之吾不顧也吾北游

長親迫逼裏足甚至幾裏矣張安人識大義特不裏  
創義園不易哉同薇不裏同璧及諸姪女乘勢而下  
不裏易易矣然獨立甚難時有鄰鄉匠員外諤良曾  
游美洲其家亦不裏足吾乃興商創不裏足會草例  
今凡入會者皆注姓名籍貫家世年歲妻妾子女已  
婚未婚約以凡入會者皆不裏足其已裏者聽已裏

而後放者同人賀而表彰之為作序文集同志行之  
來者甚多寔為中國不纏足會之始而區以會名庶  
犯禁於是漸廢去至乙未年與廣仁弟創辦粵中不  
纏足會實用此例及序文後復推至上海合士大夫  
為大會廣仁弟及卓如總其成戊戌七月吾並奏請  
禁纏足矣以知天下事無難易專問立志何如昔之

(27)  
極難者後或可竟行焉吾立禁裏足之願與廢八股  
之願二十年皆不敢必其行者而今竟行之故學者  
必在發大願既堅既誠久之必有如其願者

光緒十年甲申二十七歲  
春夏間寓城南板橋巷

既以法越之役粵城戒嚴還鄉居澹如樓早歲讀宋

元明學案朱子語類於海幢華林讀佛典頗多上自  
婆羅門旁收四教兼為算學涉獵而學書秋冬獨居  
一樓萬緣澄絕俛讀仰思至十二月所悟日深因顯  
微鏡之萬數千倍者視虱如輪見蟻如象而悟大小  
齊同之理因電機光線一杪數十萬里而悟久速齊  
同之理知至大之外尚有更大者至小之內尚包小者

剖一而無盡吹萬而不同根元氣之混侖推太平之  
世宙既知無來去則專以現在為總持既知無無則  
專以生有為存存既知氣精神無生死則專以示現  
為解脫既知無精粗無淨穢則專以悟覺為受用既  
以畔援歆美皆盡絕則專以仁慈為施用其道以元  
為體以陰陽為用理皆有陰陽則氣之有冷熱力之

有拒吸質之有凝流形之有方圓光之有白黑聲之  
有清濁體之有雌雄神之有魂魄以此八統物理焉  
以諸天界諸星界地界身界魂界血輪界統世界焉  
以勇禮義智仁五運論世宙以三統論諸聖以三世  
推將來而務以仁為主故奉天合地以合國合種合  
教一統地球又推一統之後人類語言文字飲食衣



服宮室之變制男女平等之法人民通同公之法務  
致諸生於極樂世界及五百年後如何千年後如何  
世界如何人魂人體遷變如何月與諸星交通如何  
諸星諸天氣質物類民政教禮樂文章宮室飲食  
如何諸天順軌變度出入生死如何奧遠窅冥不可  
思議想入非無不得而窮也合經子之奧言探儒佛

之微旨參中西之新理窮天人之蹟變搜合諸教披  
析大地剖析今故窮察後來自生物之源人群之合  
諸天之界衆星之世生生色色之故大小長短之度  
有定無定之理形魂現示之變安身立命六通四聞  
浩然自得然後莫往莫來因於所遇無數無譽無喪  
無得無始無終汗漫無爲謂而悠然以游於世又以

萬百億千世生死示現來去無數富貴貧賤安樂患  
難帝王將相乞丐饑寒牛馬雞豕皆所已作故無所  
希望無所逃避其來現也專為救眾生而已故不居  
天堂而故入地獄不投淨土而故來濁世不為帝王  
而故為士人不肯自潔不肯獨樂不願自尊而以興  
眾生親為易於援救故日日以救世為心刻刻以救

世為事舍身命而為之以諸天不能盡也無小無大

就其所生之地所遇之人所親之眾而悲哀振救之

日號於眾望眾從之以是為道

三術以是為行  
女同結生教  
日殤

光緒十一年乙酉二十八歲從軍算學以幾何著

人類公理既而張廷秋招游京師二月將行二十三

日頭痛大作幾死日讀醫書既而目痛不能視文字  
醫者束手無法惟裏頭行吟於室數月不出檢視書  
記遺稿從容待死乃手定大同之制名曰人類公理  
以為吾既聞道既定大同可以死矣既而得西醫書  
讀之以信而學之故創試西藥如方為之乃漸效日  
走村後大樹下至七月乃瘳鄉試不售時所問策有

宋元學案及蒙古事場中無對者皆來抄問粵城傳  
之策為沈刑部子培所問知沈君以此也然此為腦  
亂病久病後記性遂衰從此不敢復事纂學矣遷居  
西樵山白雲洞高士祠養病張延秋先生適試聞使  
發居煙濬樓出城視之晨夕過從極懽四女同完  
生數月殤

光緒十二年丙戌二十九歲 春夏居城五月復居

鄉之澹如樓是冬十二月為有溥冠字之曰廣仁後

以字行是歲作康字內外篇內篇言天地人物之理

外篇言政教藝樂之事又作公理書依幾何為之者

又著教學通議成著韻學厄言既而棄之時張之洞

督粵春間令張延秋編修告之曰中國西書太少傳  
蘭雅所譯西書皆兵醫不切之學其政書甚要西學  
甚多新理皆中國所無宜開局譯之為最要事張香  
濤然之將開局託吾與文芸閣任其事既而不果吾  
乃議以商力為之事卒不成張香濤乃欲以三湖書  
院學海堂聘吾掌教既有人言皆卻之夜為天象學



乃重定天然曆法以為人  
周之故宜以三百六十五日  
年為百周馬地之繞日卑高及乎凡有四游宜以二  
至二分名以南游北游東游西游分一周為四游馬  
今西曆仍存十二月既不用陰曆何必用十二月馬  
地球各國皆以冬至推曆以各文明國皆在赤道之

北故然至高冲卑冲皆無極準所推氣朔得大意而  
已不如以分為準日地相平無少差忒南北球異春  
秋分同而赤道之北之人較多從其多者應以春分  
為改周之正朔地能自轉故有晝夜宜以晝夜為一  
轉焉凡一切萬物皆以十位紀之不用散數周天之  
數皆定為百一日之時皆定為十下至十分十微十

秒以此類推其度量權衡皆以十進為數改曆晝夜  
為一轉分至則或八十七日為一游或九十三日為  
一游四游三百六十五日四年一閏日為一周皆吾  
地球中之定義也其月及五星各自為表分懸通衡  
則月亦並用不至如回教陽曆陰曆之兼用矣

光緒十三年丁亥三十歲  
 春居花埭伍氏之恒春  
 園三月遷居鄉之澹如樓  
 八九月游香港十一月游  
 七星岩是歲編人類公理  
 游思諸天之故則書之而  
 無窮也作內外篇兼涉西學  
 以經典諸子推明太古  
 洪水折木之事中國始於  
 夏禹之理諸侯猶今土司  
 帝霸乘權皆有天下三代  
 舊事舊制猶未文明之故

推孔子據亂升叔平太平之理以論地球以為養兵  
學言語皆於人智人力大損欲立地球萬音院之說  
以考語言文字創地球公議院合公士以談合國之  
公理養公兵以去不會之國以為合地球之計其日  
所覃思大率類是不可勝數也

光緒十四年戊子三十一歲居鄉之澹如樓春夏  
間居花埭大通煙雨讀佛典時以足跡久滯鄉間張  
延秋頻招遊京師是年鄉試五月遂決行是時學有  
所得超然物表而游於人中獨儻自喜既至而延秋  
病重遂視其殁營其喪八月謁明陵單騎出居庸關  
登萬里長城出八達嶺一日而還游湯山乃歸得詩

數十章九月游西山時請求中外事已久登高極望  
輒有山河人民之感計自馬江敗後國勢日蹙中國  
發憤只有此數年間暇及時變法猶可支持過此不  
治後欲為之外患日逼勢無及矣時公卿中潘文勤  
公祖蔭常熟翁師傅同和徐桐有時名以書陳大計  
而責之京師譁然值祖陵山崩千餘文乃發憤上書

萬言極言時危請及時變法黃仲穀編修紹箕沈子

培刑部曾植屠極君侍御仁守寔左右其事自黎純

齋後無以請生上書者當時大惡洋務更未有請變

法之人吾以至微賤首倡此論朝士大攻之十月遞

興祭酒盛伯義先生置祭酒素亢直許之上時翁常

熟管盡以文中有言及馬江敗後不復登用人才以



為人才各有所宜。能言治者未必知兵。若歸欽於朝  
廷之用。人失宜者。時張佩綸獲罪。無人敢言。常熟恐  
以此獲罪。保護之。不敢上。時適冬至。翁與許應駘李  
文田同侍祠天壇。許李交攻。故翁不敢上。時鄉人許  
李皆位侍郎。怪吾不謁彼。吾謂彼若以吾為賢也。則  
彼可來先我。我布衣也。到京師不拜客者多矣。何獨

怪我卒不謁故見恨甚至也國子監既不得達盛祭

酒持吾文見都御史祁文恪公世長文恪公亟稱其

忠義許代上約以十一月初八日到都察院遞之御

史屠梅君派人候焉吾居米市胡同南海館出口即

菜市也既衣冠將出僕人譚柏來告菜市口才殺人

車不能行心為之動私念吾上書而遇殺人兆大不

吉家有老母豈可遽死。即而思吾既為救天下矣。生  
死有命。豈可中道畏縮。慷慨登車。從南繞道行。出及  
門。屠御史遣人來告云。祁公車中患鼻血。眩暈而歸。  
須臾期。遂遂車。祁公以病請假。候之。而津海已冰。不  
能歸。遂留京師。祁公繼續請假。至正月。屠梅君以言  
事革職。永不叙用。歸政大婚。典禮重疊。吉祥止止。非

痛哭流涕之時朝士久未聞此事皆大譁鄉人至有  
創論欲相逐者沈子培勸勿言國事宜以金石陶遺  
時徙居館之汗漫舫老樹蔽天日以讀碑為事盡觀  
京師藏家之金石凡數千種自光緒十三年以前者  
畧盡睹矣擬著一金石書以人多為之者乃續色慎  
伯為廣藝舟雙楫焉既不設政事後事經說發古文

經之偽明今學之正即大收漢碑合之急就章輯月  
漢文記以還蒼頡篇之舊焉屠梅君侍御仁守篤  
守朱學忠純剛直每與語國事輒流涕舉朝無甚比  
吾頻為草摺九十月時為草請開言路摺請鑄銀錢  
摺時鐵路議起張之洞請開蘆漢鐵路而苦無款吾  
與屠梅君言宜用漕運之便十八站大路之地先通

南北之氣道近而費省宜先築清江浦鐵路即以折  
漕為之去漕倉之官役歲得千數萬可為築路之資  
十二月屠君上之發各督撫議於是定築蕙漢為幹  
路籌款三十萬胡張之洞督兩湖辦馬既而李鴻章  
謂陪京更急請通奉直之路遂改築矣甫至山海關  
而後提其餘款千餘萬築頤和園大工遂停去年容

閣乃請築津鎮鐵路吾實助之奉旨允行既而政變  
撤容閣差今命胡燏張翼督辦蓋十一年矣津蘆津  
鎮皆未舉行嚮用我言當時以漕折行之成功已七  
八年南北之氣久通士智民利之增進多多矣頤和  
園廣袤十餘里咸豐十年興圓明清漪靜宜等園皆  
為英人所焚時西后以游樂為事自光緒九年經營

海軍籌款三千萬所購鉄艦十餘艘至是盡提其款  
築頤和園窮極奢麗而吏役展轉扣剋到工者十得  
其二成而已於是光緒十三年後不復購鉄艦矣敗  
於日本寔由於是既提海軍之款營購園林即用海  
軍之人以督大工若內府嬖倖恩佑立山之流皆任  
海軍之差又虛不足別於戶部之外開海軍捐二三



千金得寶錄州縣四五千金得寶錄知府七八千金  
得寶錄道皆以特旨簡放不由吏戶兩部然其成數  
既比戶減數倍於是起者雲起皆不於戶部而於海  
軍焉然所謂海軍者特南海子順和園之土木而已  
非海上之軍也中國新政名實相反如此乙未和議  
成後停止海軍外國詔其舉措之奇而中國人以為

美政蓋停止海軍者停園工也。經劉台履惠之後，故有此美政。外國人據其名觀之，宜其相刺譏也。當時聞海軍捐事，以書責吏部尚書徐桐，因與屠侍御言之。屠君查得人甚多，為之草摺，既上，奉旨停止。然屠君以此為怨府。十二月十五日，太和門災，屠侍御親救火甫退，未還宅，即先來屬草摺一請，停頤和園工。

二請醇邸不預政事三責宰相無狀請以災異罷免  
時當國者為孫毓汶也四請宦者勿預政事責李聯  
英也其餘尚有數大事屠君得罪願以此蓋此數請  
皆國家第一大事無人敢言者屠君既還無怨色時  
洪石臣給事良品亦有直聲與屠同鄉交厚吾走責  
以為屠君事洪不敢也

四月三妹卒。先是妹婿游湘琴，以去年六月歿。以商務之虧，負責甚多，皆於吾妹乎任之。有甥三人，呱呱在抱，憂勞既甚，竟以殞亡。吾長妹二氣至，相友愛。妹聰明強記，端靜寡言，好學不倦，以貧而死。吾遠游，無成，竟不能救之，哀惻心目，乃為文遙祭之。諸甥雖為吾撫，其長者已有婦矣，而其幼者今歲殤矣。人倫之

戚自伊始矣。

順天試已列第三名。以吾經策瓌偉場中。多能識之。

侍郎孫詒經曰。此卷當是康某大學士徐桐銜吾前。

書乃謂如此狂生不可中。抑置副榜。房官王學士錫。

著爭之。徐更怒。抑置廢錄第一。

於是上興土木。下通賄賂。孫毓汶與李聯英密結把。

持朝政士夫掩口言路結舌羣僚皆以賄進大臣退  
朝即擁娼優酣飲為樂孫毓汶倡之禮親王張之萬  
和之容貴熙敬之流交媚醇邸以取權貴不獨不能  
變法也即舊政風紀亦敗壞掃地官方凌遲士氣盡  
靡蓋甲午之禍敗所由來久旅京師日熟朝局知其  
侍亡決然舍歸專意著述無復人間世志意矣既審

中國之亡救之不得坐視不思大發浮海居夷之款  
欲行教於美又欲營殖民地於巴西以為新中國既  
皆限於力又有老母未能遠遊遂遠粵將教授著書  
以終焉

光緒十五年己丑三十二歲九月出京冒雨游兩

湖自杭至蘇州游虎邱獅林諸勝破長江登石鍾山  
撫曾彭之餘風左江右湖其樂無有入九江游廬山  
謁朱子白鹿洞望鄱陽湖四月溯江上游武昌登黃  
鶴樓晴暉閣游漢陽城至十二月還粵陳和澤尚童  
子遂能有志先來省予



光緒十六年庚寅三十三歲春居徽州會館有池  
 石之勝既而移家羊城之雲衢書屋先曾祖之老屋  
 也三月陳千秋來見六月來及吾門八月梁啟超來  
 學陳通甫又字禮吉時讀書甚多能考據以容禮來  
 見凡三與論詩禮泛及諸經吾乃告之以孔子改制  
 之意仁道合羣之原破棄考據舊學之無用禮吉恍

然悟首來受學語及身世家難哀感涕下因以生死  
之理告之禮吉超然蹈道自在矣凡論今古天下奇  
偉之說諸經真偽之故閑則信而証之既而告以堯  
舜三代之文明皆孔子所託閑則信而証之既則告  
以生馬馬生人人自猿猴變出則信而証之乃告以  
諸天之界諸星之界大地之界人身之界血輪之界

各有國土人民物類政教禮樂文章則信而証之又  
告以大地界中三世後此大同之世後有三統則信  
而証之天才亮特聞一知二志宏而思深氣剛而力  
毅學者之所未見也是歲既興世絕專意著述著婆  
羅門教考王制義証毛詩偽証周禮偽証說文偽証  
爾雅偽証九月石星巢延吾教冬課於廣府學宮考

第祠吾幼侍先祖教地也欣然從之說詩焉三水徐  
勤來見八月生子殤

光緒十七年辛卯三十四歲始開堂於長興里講

學著長興學記以為學規與諸子日夕講業大發求

仁之義而講中外之故救中國之法來學多志士若

韓文學梁朝杰曹泰多有成者既明而起誦貫至夜  
深又以暇著書事母是時精力尚足焉七月新學偽  
經考刻成陳千秋梁啟超助焉冬王覺任麥孟華皆  
來學義烏朱容生侍御一新時教廣雅來訪與辨難  
頗多興語中外之變孔子之大道朱君不信即請吾  
打破後壁言之乃大悟其與人言及見之書札乃其

門面語耳。

光緒十八年壬寅三十五歲移請堂於粵城衛邊

街鄭氏祠學者漸衆正月龍澤厚以知縣引見道過

粵來學焉積之仁質甚厚嘗創辦廣仁善堂聚衆千

人講求學誘衆而帥李鑑堂禮之今辦乞丐院又修

孔廟者以與陳禮吉充學長用孔子生二千四百四  
十三紀年制大成舞作教以祀孔子置于殿以舞大  
武歌酌桓齋般六章復古之禮容焉與學者習儀禮  
十七篇置禮樂器笙磬管鼓祝敔皆具禮必立賓主  
器物位置有定蓋太平之意也依廡僦尺為荀勗  
之十二笛而笛管甚長手指不能遠握不能成聲乃

悟古人身體甚長故尚有長狄去巨獸之期不遠地  
熱力甚大故也今隔二千餘年地繞日漸遠熱力漸  
小人身漸短因推丹過二千餘年今留亦不合後人  
之用後萬年人小極多是歲鄧鉄香鴻臚承修延  
吾教惠州尚志堂之書院閱文數月七月將赴惠州  
而鉄香先生卒遂不赴



是時所編輯之書甚多而孔子改制考體裁博大選  
同學高才助編纂焉以孔子所制之禮與三代舊制  
不同更與劉歆偽禮相反古今淆亂莫得折衷考者  
甚難乃刺取古今禮說立例以括之一孔子定說以  
春秋公羊董氏繁露禮王制論語孟子荀子為主次  
三統說孔子每立一制皆有三統若建子建寅建丑

尚白尚黑尚赤鳴鳴平旦日午為朔託之夏殷周者  
制雖異而同為孔子之正說皆可從也三曰存舊周  
初遺制諸國舊俗皆襍見於諸子而管子最多劉歆  
所採以為禮者然可以考舊制故次焉四曰闢偽墨  
歆偽撰周禮左傳及諸古文經之說向來竄亂於諸  
經中者辭而闕之五曰傳譌有劉歆以後諸儒展轉

附會訛傳者是書體裁博大自丙戌年與陳履笙議  
修改五禮通考始屬稿及己丑在京師既謝國事又  
為之是年編次甚多選同學諸子分葺焉以速周書  
穆王傳山海經皆與周禮及劉歆之說合刺取其說  
命韓雲首輯焉以証為劉歆之偽撰方言亦劉歆託  
之楊雄者並刺取其說焉又編魏晉六朝諸儒杜撰

典故考。又撰史記書目考。以七畧書名多偽。一析表  
於史遷。以得其真相。欲正定文字。後以東西漢文字  
寫定六經。又撰孟子大義考。墨子經上注。以偽左  
傳乃墨歟。採國語而成。改分國為紀年。以其殘本春  
秋前事及晉魯之繁複者為國語。故鄭語無春秋後  
事。楚語皆靈王後事。魯語記敬姜一婦人事。凡八孔

子博學事凡四吳越語別一筆墨不類全体史記十  
二國年表自稱採春秋國語乃史遷親讀國語原本  
為之者依其年月事類按國分之將左傳國語合編  
為國語原本去其經文及書不書稱不稱君子曰之  
義又擇其盜竊諸傳記若北宮文子所引有威可畏  
有儀可象等文割自孝經之類去之又擇其偽古文

禮典周禮合者去之以還國語原文之舊令長女同  
薇編之薇時十五歲天資頗穎勤學強記遂能編書  
也薇又將廿四史編各國風俗制度考以驗人羣進  
化之理焉

光緒十九年癸巳三十六歲

仍講學於街邊街冬

遷草堂於府學宮仰高祠賃之十年為久計徐君勉  
梁卓如之力也君勉急朋友之難常供養朋友之才  
賢者以及刻書移草堂之貲皆任焉幾以任邨破其  
家矣學者來日衆於時曹泰精思妙悟徐勤堅苦  
強毅以進於成是歲以梁卓如與陳禮吉充學長焉  
旦晝講學夕則編書諸子亦編書焉書題甚多撰三

世演孔圖未成八月三叔父玉如公卒著孟子為公  
羊學考論語為公羊學考是時絕意試事諸父皆  
強之母意屬望迫切乃與母言盡於是科不第亦終  
身棄矣母許之於是應鄉試中式第八名本置第二  
名三藝皆刻矣以次篇書同文有用孔子改制義違  
朱注犯磨勘既刻而抽出改置第八名是冬十二月



為母壽。溥宦游於浙亦歸家庭甚懽然吾不奉考官  
房官為師時論大譁謗言宏起由此蓋變千年之俗  
誠不易也。吾鄉有同人團練局者咸豐四年吾伯  
祖種芝公諱國燾平紅匪創之蓋地方自治之始也  
局中地十餘里三十二鄉人丁五萬自吾伯祖卒後  
局事廢壞至是大渴鄉知府張蒿芬者以罷謫還鄉

管鄉局馬。鄉素多盜。張竟與分肥。張為局中巨紳。無  
敢抗之者。其族人之為盜者。深夜出劫。乃竟持其篋  
篋還局中。飲酒乃去。以所劫物分賞局壯丁。局在墟  
中。壯丁凡數十。墟以三八日期。三十鄉人聚而市易。  
人多若蟻。張族之盜曳履局門。大號於衆曰。吾為某  
盜。諸君何不來執我。衆睨之。莫敢犯。鄉鄰被劫者夜

不絕從叔觀察。三被劫家一空。吾胞叔亦被劫。吾  
姪同和姪婿陳和澤以家頻劫。亟請吾治盜。而張庇  
之。非攻張盜不能去也。而吾寔無暇還鄉任事。陳禮  
吉吾鄉人也。乃曰。吾窮天人之理已至矣。已無書可  
讀矣。惟未嘗試於事。吾等日言仁。何不假同人局而  
試之。是亦一國土也。行仁施愛。先自近始。開學校以

教之開蠶桑以富之修道路以治之一歲而化成然  
後委之謹愿者守之吾復可治吾學矣壯其言乃號  
於卅二鄉之紳合三十餘人攻張令其將局戮交出  
戮者局之印也吾伯祖領之官以辦事者是時春祭  
鄉先賢吾與祭張率諸賊懷刃以待賊藏其室中相  
去幾步張面色大變袍袴抖顛吾大異之從容行禮

畢入室則張族人數百環堂下將甘心於我同和走告而我鄉人窺見其人皆懷刃知有變亦走還鄉率鄉人數百携軍械整隊來迎吾得出張亦行各率其隊伍還其鄉是役也頗如西國會盟劫質狀吾泊船吉利鄉吾以小舟入九江謁朱先生廟張遣盜運登舟露刃問余搜船不見乃去是二事者吾幾凡殆矣

同知去惡之難也。於是以千二百金大購羣書。禮吉  
故精於擇書。書藏。要書咸備矣。乃議創書院。以中西  
之學課士。延朱榮孫以教之。乞官兵以剿賊。賊盡走。  
殺渠魁數人。大禁賭。宿弊盡清。而以禁賭持正。遇烈  
又鄉有被殺者。疑案也。禮吉以某富人行賄。疑其殺  
持之甚堅。以是為眾怨所薰。請功未竟。張緣怨託言

官劾我又賄託潘衍桐與南海縣令楊廷槐追繳局  
截吾時被劾為桂林之游禮吉已被肺病乙未正月  
遂吐血死禮吉蓋殉節同人局者也自癸巳十一月  
攻張事起謗言騰沸吾幾死於是而禮吉寔殉難與  
為中國變法吾與卓如幾死於是而幼博譚復生楊  
漪川林墩谷寔殉難焉十里之地與萬里之地五萬

之民與四萬萬之民相去萬倍而欲矯而易之救而治之其謗議同其險難同其幾死同而傷我良人同小有成功而傾覆同嗚呼任事之難如此宜人爭諍老氏學保身家妻子坐視生民之傾覆顛連而不恤也吾為同人局僅支與錢數百而他心力之瘁日力之曠金錢之耗危殆疑謗之集倉皇避地與八月國



變未有少異也。局一極小之事，即成功，何足勞我？費  
我心血，老我歲月，傷我禮吉哉！梁卓如蓋頻諫之。既  
以大小無殊，但推惻隱之心，以行吾仁，不計禍患，不  
計大小，不計成敗也。當緣隨遇起而行之，治同人局  
與中國，真未有以異哉。有禮吉之死，吾恨之深。乙未  
草摺，令御史王佑遐劾之，有其通賊書為據。卒賄譚

鍾靈洗滌而任局事者不可復得禮吉之才志亦一切無成功書藏之書多為人士偷竊吾入京師亦不復過問蓋自癸未至戊戌同人局事與中國事相終始其乍成乍敗皆相類存之以告天下以我為貪功名乎抑行其不忍人之心乎張故吾舊好以其庇賊惡之戊戌年以其少安靜亦復置不問了此人天業

矣

初

光緒二十年甲午三十七歲

二月十二日與卓如

同入京會試寓盛茶酒伯熙即伯熙先生肅王從弟

也藏書冠滿洲頗見其秘書玉牒金石之藏園亭幽

靚既而移居三條胡同金頂廟與梁小山同寓五月

六月下車傷足遂南歸。六月到粵。七月給事中余晉  
珊劾吾惑世誣民非聖無法同少正卯聖世不容請  
焚新學偽經考而禁身士從學沈子培盛伯熙黃仲  
敦文芸閣有電與徐學使琪營救張季直走請於常  
熟曾重伯亦奔走焉。皆卓如在京所為也。以電文伯  
熙字誤作伯翊。徐花農疑為褚伯約之誤也。時褚方

十月任公出京

丁文江

劾李瀚章而余之奏寔鄉人陳景華賄褚為之李畏  
褚遂令自行焚燬學城謗不可聞八月游羅浮九月  
歸復講學十月嘗著偉卒著偉聰悟堅苦成學以詣  
羅浮求道感瘴死率同門弔其家痛哉十一月游廣  
西住風洞刻記於黨人碑搜得康岩素洞有名而刻  
石焉桂中諸士王濬中穎初況仕任黎文瀚來學王

穎初老矣。嘗為教官。志清而氣直。好心學。寓桂林。凡四十日。往來在山水窟中。亦四十日。日日搜岩剔壑。及赴官。紳燕會。若經年矣。五月方在京師。有貴人問曰。國朝可百年乎。吾答之以禍在眉睫。何言百年。貴人甚謬之。時擬以三千萬舉行萬壽。舉國若狂。方謀保舉而孫毓汶當國。政以賄成大官化之。惟事娛

樂內通李聯英相與交關。政俗之污壞。官方之紊亂。至是氣為極。不數日。開朝日之事。十七日出。及天津。則調衛汝貴乘海晏輪船東渡。衛方被酒未醒也。已而東事累敗。恭邸李高陽翁常熟入軍機。並督辦軍務焉。吾昔上書言日本改紀。將翦朝鮮而窺我邊。又言數年之後。四夷通於外。亂民起於內。安能待我十

年教訓乎恐無及也不及六年變作不幸而言中矣

桂林山水極佳山居舟行著春秋董氏學及孔子改

制考

光緒二十一年乙未三十八歲正月遷粵二月初

一至而二十四日禮吉死矣哭之慟欲為立墓碑至



今未果也。禮吉聰明絕人而氣魄剛毅。大道完成。為  
負荷第一人。竟夭。年僅二十六。痛哉。十二日偕車如  
梁。小山入京。將至大沽。日人來搜船。當頗憤。以早用  
吾言。必無此辱也。時內廷預備車輛五百。以備遷都。  
朝士紛紛。多慮國亡。出京師者。吾謂此舉僅如土耳。  
其者必不亡。故決入京。與梁小山寓金頂廟。時旅順

已失朝廷震動命戶部左侍郎張蔭桓及前巡撫邵友濂往日本請和。日本以非全權不受。再命大學士李鴻章求和議。定割遼台并償款二萬萬兩。三月二十一日電到北京。吾先知消息。即令卓如鼓動各省并先鼓動粵中公車上。摺拒和議。湖南人和之。於廿八日粵楚同選粵士八十餘人。楚則全省矣。與卓如

分託朝士鼓各直省莫不發憤連日并通章滿察院  
衣冠塞途圍其長官之車台灣舉人垂涕而請命莫  
不哀之時以士氣可用乃合十八省舉人於松筠庵  
會議與名者千二百餘人以一晝二夜草萬言書請  
拒和遷都变法三者卓如孺博書之并日繕寫京師  
無點石者無自傳觀否則尚不止一千二百人也徧

傳都下士氣憤湧聯軌察院前里許至四月八日投  
遞則察院以既已用實無法挽回卻不收先是公車  
聯章孫毓汶已忌之至此千餘人之大舉尤為國朝  
所無閩人編修黃曾者孫之心腹也初六七連日  
大集初七夕黃夜編投各會館阻撓此舉妄造飛言  
恐嚇諸士多有震動者至八日則街上編貼飛書誣

攻無所不至。諸孝廉遂多退縮。甚且有請除名者。孫毓汶猶憲擬其謀。即先迫皇上用寶。令北洋大臣王文韶誣奏海嘯壘械棄毀。北洋無以為備。孫毓汶與李聯英內外恐嚇。是日翁常熟入朝房。猶力持勿用。寶電曰。相伊藤博文請展期五日。孫謂若爾。曰。人必破京師。吾輩皆有身家。實不敢也。常熟厲聲責之曰。

我亦豈不知愛身家其如國事何。諫知不能強乃使  
李聯英請之太后。迫令皇上畫押。於是大事去矣。是  
時降硃諭告廷臣。皆哀痛不得已之言。皇上之苦衷  
迫逼之故。有難言之隱矣。李聯英為宦寺不識地圖  
乃至徐用儀亦然。皆曰中國甚大。台灣乃一點地。去  
之何妨。太后習聞之。故輕於割棄也。越日。榜發中進

士第八名。本擬會元總裁徐桐以次篇優優大哉禮  
儀三百威儀三千題文分天地人鬼四比惡其太奇  
降第五云殿試朝考皆直言時事讀卷大臣李文田  
與先中丞公宿嫌又以吾不認座主力相排殿試徐  
壽新侍郎樹銘本置第一各閱卷大臣皆圍矣惟李  
文田不圍並加黃簽焉降至二甲四十八名朝考翁

常熟欲以擬元卷在李文田處乃於閔鍊等字加黃  
簽力爭之遂降在二等徐激周翦常熟告我閔與李  
嫌之故故知之先是殿試前朝士皆以元相期傳臚  
時諸王猶言之是科會朝殿三者皆失元區區者不  
足道雖王荆公未嘗言之然本朝科第無不奉座主  
為師者無理已甚沈子培以吾不認座主為師必累



得元力勸折節至有道之不行國之興廢命也之語  
元亦何與國事而關係如此子培以吾之虛望欲藉  
以轉移諸公也然吾以子培力勸已屈節見座主矣  
而卒皆失元是知一切有命正可體驗從自己閱歷  
處受用最確乃所謂死生有命富貴在天皆非人所  
能為也枉已者徒自貶節而已十一日引見授工部

主事。自知非吏才，不能供奔走。又生平諄學著書，自  
分以布衣終，以迫於母命，屈折就試，原無意於科第。  
况仕宦乎？未能為五斗折腰，故不到署。徐公樹銘至，  
累揖相勸，吾卒不行。前書未能上，二十八日朝考後，  
無事，乃乙拒和之論，而增末節於閏四月六日遞之。  
察院以十一日上於朝，上覽而喜之，甫發下，樞垣一

時許樞臣讀未畢恭邸聞至論鎮務一條以手作團  
狀上既追入旋給下軍機命即日抄四份軍機本無  
一書手乃謂自內閣即日抄呈以一呈太后以一存  
軍機發各省督撫將軍議以一存乾清宮南窗小篋  
以一存勤政殿備覽觀於羣臣上書中凡存九摺以  
胡燏棻為第一吾摺在第二至戊戌五月上再問樞

臣以吾舊摺樞中丹牘上上之強記不遺一善如此  
五月遷出南海館再草一書言變法次第曲折之故  
凡萬餘言尤詳盡矣至察院遞之都御史徐郁使人  
告以吾已有衙門例不得收令還本衙門代遞時孫  
家鼐長工部頗相慕友人多勸到工部遞乃於五月  
十一日到工部遞之孫家鼐面為稱道之詞許為代

遞五堂皆畫押矣李文田適署工部獨扶前嫌不肯  
畫押孫家鼐碍於情面累書並面責之卒不遞丹與  
卓如瑞博聯名遞察院不肯收又交袁世凱遞督辦  
處榮祿亦不收遞決意歸以京城街道蕪穢請修街  
道附片上馬既不達交王幼霞覓人上之奉旨允行  
交工部會同八旗及順天府街道廳會議卒以具文

覆奏惟御史陳璧後行之。僅修宣武門一段。馬威祭  
酒曰。修道歲支帑六十餘萬金。旗丁工部街道廳分  
之。若必修則無可分矣。此所以不能行乎。陳次亮沈  
子培皆以時有可為。非僅講學著書之時。力為挽留。  
於是少留。以士大夫不通外國政事風俗。而京師無  
人敢創報。以開知識。變法本原。非自京師始。非自王

公大臣始不可乃興送京報人商每日刊送千份於  
朝士大夫紙墨銀二兩自捐此款令車如孺博日屬  
文分學校軍政各類日騰於朝分送朝士不收報費  
朝士乃日閑所不閑識議一變焉時翁常熟以師傅  
當國抵於割台事有變法之心來訪不遇乃就而謁  
之常熟謝戊子不代上書之事謂當時實未知日本

之情此事甚慚云乃與論变法之事反覆請求自未  
至西大洽索吾論治之書時未知上之無權而責常  
熟力任变法推見賢才常熟乃謂與君雖新見然相  
知十年實如故人姑為子言宜密之上實無權太后  
極猜忌上有點心賞近支王公大臣太后亦剖看視  
有密語否自經文芸閣召見後即不許上見小臣即



吾之見客亦有人窺門三巡數之者故吾不敢見客  
蓋有難言也吾乃始知宮中事然未知其深猶頻以  
書責之至謂上不能保國下不能保身常熟令陳次  
亮來謝其意然苟不能為張柬之之事新政必無從  
辦矣時常熟日讀变法之書銳意变法吾說以先變  
科舉決意欲行令陳次亮草定十二道新政旨意將

次第行之。然恭邸高陽以常熟有毓慶之獨對。頗妒之。自四月合力攻孫毓汶。李鴻章後漸不和矣。常熟內畏太后。欲託之恭邸而行。而恭邸不明外事。未能同心。卒不行也。時孫毓汶雖去。而徐用儀猶在政府。事事阻撓。恭邸常熟皆欲去之。欲其自引病。疊經言官奏劾。徐猶戀棧。六月九日。革摺覓戴少懷庶子劾。

之戴逵逡不敢上乃與王幼霞御史鵬運言之王新  
入臺敢言十四日上馬是日與卓如孺博游西山登  
碧雲寺塔竟夕月明如畫遠望京師在烟霧中樂甚  
越日歸而徐用儀逐出拒譯兩署焉是時粵撫馬丕  
瑤受剛毅意保奏市僧潘贊清為三品卿得旨賞給  
之草摺交王幼霞附片上之剛毅曾受其重金力為

保護不能去也。中國風氣向來散漫。士夫戒於明世  
社會之禁。不敢相聚。請求故轉移極難。思開風氣。開  
知識。非合大群不可。且必合大群而後力厚也。合群  
非開會不可。在外省開會。則一地方官足以制之。非  
合士夫開之于京師不可。既得登高呼遠之勢。可令  
四方響應。而舉之于輦轂衆著之地。尤可自白嫌疑。

故自上書以後日以開會之義疏之於同志陳次亮  
謂辦事有先後當以報先通其耳目而後可舉會報  
開兩月輿論漸明初則駭之繼漸知新法之益吾復  
挾書游說日出與士大夫講辨並告以開會之故明  
者日衆乃頻集通才游宴以鼓勵之三舉不成然沈  
子培刑部陳次亮戶部皆力贊此舉七月初與次亮

約集客若袁慰亭

世凱

楊叔橋

丁淑衡

玄鈞

及沈

子培沈子封兄弟

張巽之

孝謙

陳

即席定約各

倡義捐一舉而得數千金即舉次亮為提調張巽之

習之張為人故反覆而是時高陽富國張為其得意

門生故沈子培舉之使其勿嚴壞也舉吾草序文及

章程與卓如擬稿而公商之丁張畏謹數議未定吾

欲事成亦迂迴而從之於是三日一會於炸子橋萬  
雲草堂來者日衆翰文齋願捐送群書議開書藏於  
琉璃廠乃擇地購書先屬楊博出上海辦焉是時徧  
尋琉璃廠書店無地球圖京師錮塞風氣如此矣安  
得不敗時英人李提摩太亦來會中國士夫與西人  
通自此始也英美公使願大助西書及圖器規模日

廣矣乃發公函於各督撫劉坤一張之祠王文韶各  
捐五千金乃至宋慶嘉士咸咸捐數千金士夫雲集  
將俟規模日廓開書藏派游學游歷然而丁張斷斷  
挑剔張更藉漁利以開局於琉璃廠張欲以託之為  
書店之狀吾西折以今日此舉以義倡天下之士若  
以義始而以利終何以見天下乎張語塞然而舉座



不懂時報大行。然守舊者疑謗亦漸起。當時莫知報之由來。有以為出自德國者。有以為出自總理衙門者。既而知出自南海館。則群知必吾所為矣。張既懷嫌。乃因報之有謠言。從而扇之。於是大學士徐桐。御史褚成博。皆欲劾奏。沈子培。陳次亮。皆來告。促即行。而留卓如辦事。乃以八月廿九日出京。先是自六月

乙未冬代序  
國華報館  
李雲

創報吾獨自捐款為之後陳次亮張君立皆來相助  
而每期二金積欠甚多至八月節盡典衣給之得次  
亮助盤費乃能行廿四日同會諸子公饒唱戲杜盛  
會也是日合肥自願捐金二千入會同會諸子擴之  
議論紛紜揚崇伊泰勅之黨遂始於此張孝謙又邀  
褚成博張仲忻二人入會二人台中最氣縱橫者

蓋會事甫成而衰敗即萌焉九月初二日到天津初三日游山海關入各防營視兵望海山海關本無形勢可守明世防遼為東道扼要之地若今海船交通珠海寸寸可擾山海關防兵實可罷矣見陝撫魏午莊光燾相待甚殷惜其未知新法也十二到上海十五入江寧居二十餘日說張香濤開強學會香濤頗

以自任。隔日一談。每至夜深。香濤不信孔子改制。頻  
勸勿言此學。必供養。又使星海來言。吾告以孔子改  
制大道也。豈為一兩江總督供養易之哉。若使以供  
養而易其所學者。香濤奚取焉。在江寧時事大順。吾  
曰。此事太順。將來必有極逆者矣。與黃仲弢。梁星海  
議章程。出上海刻之。而香濤以論學不合。背盟。電來

屬勿辦則以金章大行不能中止告乃開會賃屋於  
張園旁遠近響應而江寧一切不來處處掣肘即無  
楊崇伊之勅亦必散矣時金陵有楊仁山者講佛學  
有道士也曾游倫敦得儀器甚多吾為強學會購之  
凡三千餘金其天文鏡大者能窺見火星之山海矣  
以其小者送之京局後香濤星海背盟王雪晴允捐

之後亦背及京局有變款不能結吾賠累歸之  
之器運之楊然以此訝甚多蓋任一小事皆極難但  
吾惻隱之心不以難而變耳吾以十二月  
歸先調君勉易一來辦事急須開報以用孔子紀年  
及刊上諭事江寧震動適有京師劫案遂藉此停止  
自強學會開後海內移風紛紛開會各國屬目有封

禁後漸諱新政方當西后杖二妃逐侍郎長麟汪鳴鑾志銳之時至逾年二月撤毓慶宮逐翁常熟文雲閣殺寇良才將築圓明園以幽上於是開新之風掃地矣先是翁常熟在毓慶宮獨對吾頻謂之曰公赴此舉大事不可失若能行新政廢八股則一月中新政甚多公即去官可矣若度不能行則勿如先辭毓

此語為光緒二十一年乙未前作故敘事止于是歲門人羅孝高不知從何得之蓋戊戌抄沒落於人間而孝高得之也  
更姓年七十記

慶宮蓋同相而獨對僚友所忌也徒取辱耳公亟辭之  
又翁常熟五月前能從容請求新政及六月派總理衙門行走事殷多至夜分自此不暇見士大夫而一事不辦吾累書勸其力辭總署之差常熟不能從後以割膠事為罪謗所歸榮祿嗾其私人劾之常熟卒以是遂常熟去官後云悔不聽我言也



光緒二十二年丙申三十九歲請學於廣府學宮

萬木草堂續成孔子改制考春秋董氏學春秋學使

徐君勉王鏡如為學長七月與幼博弟游羅浮八月

游香港十月至澳門與何君穗田創辦知新報將游

南洋不果穗田慷慨好義力任報事後還城六月時

在同人局行抽籤舉局長行地方自治法惜無人能  
行之遂罷局事先是為同人購書千餘金畧備是以  
感欲成一書院卒不能十二月重游廣西與羽子兄  
偕鏡玉偕行鏡玉學佛若有得而狂不可近蓋所謂  
天魔入心者至陽朔遺之還自丙戌年編日本變政  
記披羅事蹟至今十年至是年所得日本書甚多乃

令同薇譯之稿乃具又撰日本書目志

卷之八

光緒二十三年丁酉四月十日到桂林丹

寓風洞擬築桂林馬路以山路不合未成然用日本

伊豆人力車則可行也與唐薇卿岑雲階議開聖學

會史淳之撥善後局萬金游子公布政捐千金蔡仲

此按察希紳激昂高義主持之乃為草章程序文行之  
之借廣仁善堂供孔子行禮日士夫雲集威儀甚盛  
既而移之依仁坊彭公祠設書藏講堂義學規模甚  
敞日與學者論學義學童幼尤彬彬焉暇則游山桂  
林山水既極勝去城七里有中洞者岩若一室兩面  
皆通俯瞰諸岫石筍巉然吾欲於此結精廬焉四月

興安會匪大作陷灌陽各縣蠢動勸史撫於桂林戒  
嚴不顧也與唐薇卿謀請其歸鄉辦團以聖學會行  
之唐薇卿忼慨自捐數千金募勇吾乃夜叩蔡泉門  
請其假軍械馬時五月杪也編春秋考義春秋孝文  
成撰日本書目志成六月遂集講學時學者大集乃  
晝夜會講八月納妾氏八月築室花埭將終隱焉

乃室成而未歸已被抄沒人生原逆旅我身非我有  
而何一室哉吾一生不用營謀稍營謀輒無益更可  
信天命也月杪携同薇至上海九月游西湖十月遂  
上海中國人滿久矣美及澳洲皆禁吾民往又亂離  
迫至徧考大地可以殖吾民者惟巴西經緯度與吾  
近地域數千里亞馬孫河貫之肥饒行沃人民僅八

百萬若吾遷民往，可以為新中國。當乙未，吾欲辦此。未成。與次亮別曰：「君維持舊國，吾開闢新國。」時經割台後，一切不變。壓制更甚，心震必亡。故欲開巴西，以存吾種。乙未之歸，遇葡人及曾游巴西者，知巴西曾來約通商招工。其使來至香港，而東事起。巴使在香港候吾事定。至數月，東事益劇，知不諧，乃歸。吾港澳

商咸樂任此。何君總田學畫甚詳。任雇船招工之事。於是拟入京舉此。適膠洲案起。德人踞之。乃上書言事。工部長官滋瀝讀至。恐偏安不可得語。大怒。不肯代遞。又草三疏交楊叔嶠分交王幼霞高理臣上之。乃與曾剛甫約。同遞察院。先與都憲徐壽蘅言之。壽蘅本守舊。而能待士。不以此摺為然。而允為我代遞。



也。李茲園侍郎，敬厲忠憤，欲聯九卿上摺，為草之後，無聯名者。李公交司業，詣穀上之。既謁常熟，投以書，告歸。與李合肥言巴西事，許辦之。惟須巴西使來，求乃可行。是時，將冰河，於十八日決歸。行李已上車矣。常熟來留行，翌日，給事中高燾曾奏薦，請召見，并加卿銜出洋。常熟在上，前力稱之。奉旨，交總理衙門。

議許應駁阻之於恭邸常熟再持之恭邸乃謂待臣  
等見之乃奏聞奉旨令王大臣問話御史楊漪川  
深秀博學高節來談欲相奏薦草稿有大才槃槃孤  
忠取取之語力辭之時欲續強學會之舊先與鄉人  
士開會曰粵學會於十二月十三日在南海館創辦  
京友集者二十餘人以各會館皆為京官會集欲因

而導之乃草疏交御史陳其璋上言請將總署同文  
館群書頒發各省會館以便各京官請求奉旨俞  
允又與文中允煥夏編修虎臣及旗人數輩創經濟  
學會已為定章程呈慶邸請慶邸主之且為慶邸草  
序文既而以欲刪會字議不合事遂已乃令丁叔雅  
佐壽百福成知恥會

自十一月十二日德人發砲據膠州擄去提督章高  
元朝廷託俄使言和德使甚無點顧常熟及張樵野  
日與議和未就日人參謀本部神尾宇都宮來覓鄂  
督張之洞請助聯英拒德時經割台後未知日情朝  
士亦多猜疑日本恭邸更主倚俄乃卻日本之請吾  
走告常熟明日奉之可信且與日使議請將償款再

推十年並減息日使矢野君極有意而吾政府終不信是議乃為御史楊深秀草疏請朕英日又為御史陳其璋草疏再請朕英日畧謂康熙十一年以救西班牙立主與法戰乾隆六年以救澳與普法戰又二十一年以救普與法俄瑞澳戰嘉慶元年攻法拿破侖而救普咸豐三年至五年與法救土耳其而朕俄

頃重兵於斯巴士撥死士二萬糜兵七千萬鎊光緒  
二年與法奧意救土耳其而拒俄頃重兵於毛魯孛  
島故英真救人之國也日本與我唇齒俄法得志東  
方非彼之利昔東事之役彼以國小变法自強已久  
欲奮揚威武以求自立既得勝得遠東而不得其勢  
不能恨德俄其來請聯助乃真情也英海軍甲地球

又扼蘇彝士河之權利也。若英不欲戰，歐西各國不能飛渡。若聯英日，則東西南三面如環，決皆可晏然。今地球大勢東流，皆以我為土耳其。若我與聯英人必出，上於常燕，請主持之，乃作聯英日策，編告朝士。李芑園侍郎深然之，持以示廖仲山尚書。合肥不以為然。因面詰張樵野，張謂英大國未必許助我，遲疑。

不敢發遂割膠州已而英使果出請將旅順大連灣  
威海衛通商俄使巴德蘭富大怒謂李合肥曰若貴  
國必欲將旅順大連灣通商則吾兩國從前盟約皆  
斷朝議數日不敢決吾聞之上書常熟曰此中國生  
機也吾意且欲盡開沿邊口岸以衆國敵俄况旅順  
大連灣乎必勿拒英雖俄怒以諸國力抗之必無害



也言甚切。又與張熊野言。張以吾言英可聯。今英果  
出。甚信之。謂可西告常熟。卒不過。而西后及恭邸畏  
俄甚。卒不徇英請。時賞日本之一萬萬。英人又許代  
借三厘息。不扣俄關之。又強相借四厘息。扣。於是議  
論紛紛。有主兩借者。有主兩不借者。吾言可借英款。  
俄大言恐嚇。必不緣此小故發兵也。政府畏俄。又不

敢乃用兩不借之說此事英實有底蘊之意而兩拒  
之殊為失機惟有與同志歎息而已然經此事後俄  
英日之情皆見朝士漸知英日之可信而知俄之巨  
測有此群議咸知屢英日矣吾又告常熟謂俄欲耽  
耽諸國並來吾無以拒之請盡開沿邊各口與諸國  
通商既可藉諸國之力以保境又可開士民之智識

又騰書與廖仲山言之。常熟大以為然。倡言於總署。  
於是王大臣集議多不通情勢。咸駁是說。議不行。然  
自是大連灣廣州灣之要素自此紛紛矣。

是冬幼博在上海大同譯書局刻孔子改制考春秋  
董氏學日本書目志成時嚴範孫請開經濟特科常  
熟主之。此事遂成。其章程與沈子培同議之者也。乃

說常熟並張樵野成之籍此增常科以陰去八股。

光緒二十四年

戊戌四十一歲

正月初二日總理

衙門總辦來書告初三日三下鐘王大臣約見至時

李中堂鴻章翁中堂同和榮中堂祿刑部尚書康壽

恒戶部左侍郎張蔭桓相見於西花廳待以賓禮問

變法之宜。榮祿曰：祖宗之法不能變。我答之曰：祖宗之法以治祖宗之地也。今祖宗之地不能守，何有於祖宗之法乎？即如此地為外交之署，亦非祖宗之法所有也。因時制宜，誠非得已。廖問：宜如何變法？答曰：宜變法律官制為先。李曰：然則六部盡撤，則例盡棄乎？答曰：今為列國並立之時，非復一統之世。今之法

律官制皆一統之法。弱亡中國皆此物也。誠宜盡撤。即一時不能盡去。亦當斟酌改定。新政乃可推行。藉間籌款。則荅以日本之銀行紙幣。法國印花。印度田稅。以中國之大。若制度既變。可比今十倍。於是陳法律度。支學校。農商工。鑛政。鐵路。郵信。會社。海軍。陸軍之法。並言曰。本維新仿效西法。法制甚備。與我相近。

最易仿摹。近來編輯有日本變政考及俄大彼得變政記。可以採鑑焉。至旨乃散。榮祿先行。是日恭慶邸不到。閣日召見樞臣。諭以吾言入奏。上命召見恭邸。謂請令其條陳所見。若可採取。乃令召見。上乃令條陳所見。並進呈日本變政考及俄彼得變政記。七日。乃奏陳。請誓群臣以定國是。開制度局以定

新制別開法律局、度支局、學校局、農局、商局、工局、鑛務、鐵路、郵信、會社、海軍、陸軍十二局以行新法。各省設民政局、舉行地方自治。於是晝夜結寫日本變政考、俄彼得變政記二書。忙甚。正月琉璃廠大神廟百貨並陳。僅於人日一游。餘無暇晷。時粵學會數日一集。各省會漸成。正月初十日林瞰谷開閩學會。成十



八日宋芸棟李孟符開闢學會成楊叔嶠蜀學會亦成於是鼓動直隸及湖南浙江江西雲貴今各開會矣。

前摺許應騷仍攻擊於恭邸前抑壓遲遲至二月十三日乃上即下總署議常熟將欲開制度局以我直其中時進呈俄彼得變政記附片請變生童歲科試

易八股以策論並下總署議已而俄人索旅順大連  
灣三月初一日吾上摺陳三策請拒之若出於戰則  
敗而復割未遲否則用西人蒲盧多士之例聽俄人  
佔據非吾所願猶可取也三則盡開沿海口岸以利  
益各國俄人當無如何已開定計將割矣時門人麥  
孫博公車適來吾口授一摺請以旅大與諸國聯英

拒俄言極激切。立寫上。又令孫博與龍贊修況晴皋  
等百數十人於初三日遞呈。奉憲院。見已於初四日  
畫押矣。察院亦不收矣。於是法索廣州灣。英索九龍  
威海。無不惟命是聽。然英之索威海為拒俄也。固我  
所欲與。當俄之索旅大也。上大怒。面責恭邸及合  
肥。謂汝等言俄可恃與定約。輸以大利。今約期未半。

不獨不能阻人之來分乃自渝盟索地密約之謂何  
蓋李合肥與俄聯盟保五年太平也恭李皆免冠叩  
首曰若以旅大與之密約如故上大怒向西后变色  
后曰此何時汝乃欲戰耶上默然而出遂定約時御  
史文悌素託大言謂欲願一死以報國又見華丹雲  
輝高理臣王佑遐等勸其入乾清門伏闕痛哭請

拒俄變法文悌許之楊菊川亦許之吾愛菊川欲留  
為他日乃為文悌草摺及彼上時自改請令使俄辦  
之若不許則自刎俄人前蓋逆知朝廷必不聽其使  
俄生事也

是時以旅大事朝廷震悚不遑及內政改寫書已成  
不進至初八日進呈附日本變政考順時呈泰西新

史攬要時事新論等書時償日本之款甚急中允黃  
思永請用外國公債法行昭信股票下戶部議北  
房總辦陳宗媽要安瀾素主搜括者也力主之司員  
簽名者二十餘人吾聞而投書常熱力諍之謂方今  
無事何為作此亡國之舉乙未借民債雖張之洞之  
六十萬亦不肯還民怨久矣中國官民之隔久矣誰

信官者且名為借債而以官力行之吾見乙未之事  
酷吏勒抑富民至於鎖押迫令相借既是國命無可  
控訴酷吏得假此盡飽私囊以其餘歸之公民出其  
十國得其一雖云不勒索其誰信之徒飽貪吏矣於  
國計無益而生民心為淵毆魚明世加糧可為殷鑑  
言極激切並以書責樵野而摺上即日奉旨行矣

不可挽回。然各省分派僅得千餘萬。不足為償日之用。再與德華匯豐兩銀行借一萬萬兩。八折四厘半息。去年英借而不受。今乃息昂重扣而取之。失策甚矣。且歲歲借款挖肉補瘡。僅支目前而絕不為經營。自強計則賠款無已時。借款亦無已時。是坐自斃也。統籌大局。非大籌五六萬萬之款。以二萬萬築全國



鐵路限三年成之鍊兵百萬購鉄艦百艘編立各省  
各府州縣各等各種學堂沿海分立船塢武備水師  
學堂開銀行行紙幣如此全力並舉庶幾或可補救  
以全國鑛作抵英美必樂任之其有不能則籌邊外  
熟用之地務在籌得巨款以立全局既與常熟言爲  
容純甫熟悉美事忠信可任借款又草摺二份交御

史宋伯魯陳其璋上之樞垣疑其不能行留中真可惜也。又草請改律例摺與王佑遐上之時粵中草堂徒侶雲集前摺既緣膠旅事擱起知其不行將擬歸以公車咸集欲徧見其英才成一大會以伸國憤由是少盤桓焉。李木齋亦來言開會事卓如新在湖南開南學會極盛時扶病來京幼博以醫卓如故同寓

三條胡同金頂廟乃定於廿二日開保國會於粵東  
館為草定章程士夫集者數百投籌公舉演說舉吾  
登座樓上下人皆滿聽者有泣下者蓋自明世徐華  
亭集靈濟宮講學後未有所舉也廿五日再集於松  
雲草堂廿九日再集於貴州會館人皆逾百數是時  
各省人士應時開會保漢會保浙會繼起人數皆逾

百數。當是時。公車如雲。來見者日數十。座客填塞。應接不暇。分日夜之力。往各會宣講。客果或不能見。見亦不能答拜。多有怨者。吏部主事洪嘉興者。守舊之有心力。能樹一細党者。三來拜不得遇。聞者忘其居址。又未能答拜。洪以為輕己。乃大造謠。於是謗言益作。浙人孫灝者。欲得舉經濟特科。洪銛之。謂某公惡

康若能攻之必可舉特科也孫故無顧喜從之洪乃  
革駁保國會議謂吾將欲為民主教皇刻數千本編  
投朝貴於是謗言益沸乃停會而四方之士投書預  
會者紛紛於是李盛鐸參保國會以求自免四月初  
七日潘慶瀾附片劾吾聚眾不道上曰會為保國豈  
不甚善然慮西后見之特抽出此片蓋吾正月之摺

已請開社會局明會黨之善又編日本會黨考附日本  
變政記進呈上知各國通行之俗以開民智而  
勵士氣者故不禁也時御史黃桂鋆劾保漢會保浙  
會並及保國會皆洪嘉興為之云於是謗言塞途賓  
客至交皆避之不敢入門可羅雀與三月時成兩世  
界矣上讀日本變政考而善之再催總署議復然以

粵中學者咸集已決歸上時決意變法使慶邸告

西后曰我不能為亡國之君如不與我權我寧遜位

西后乃聽上於時恭邸薨吾乃上書常熟促其亟變

法勿失時常熟以吾詩鼎沸亦欲吾去乃召選亦聽

吾歸矣時與日本矢野文雄約兩國合邦大會議定

稿極詳請矢野君行知總署答允然後可大會於各

省而俄人知之矢野君未敢時舊黨譏甚熾常熟頻  
被劾以吾行後無人鼓舞故欲成數事乃行十八日  
乃草摺請定國是而明賞罰交揚潯川上之畧謂門  
戶水火新舊相攻當此外患交迫日言變法而衆論  
不一如此皆由國是未定故昔趙武靈之胡服秦孝  
公之變法俄彼得及日本維新之變法皆大明賞罰



定國是而后能行新政。又為一編。交徐子靜學士上之。徐君廉靜寡欲。無意仕宦。吾以開會。由金頂廟遷出上斜街。與徐宅相望。月夕過從。徐君老而好學。乃至請吾說春秋例。座聽之。近古所無也。廿三日。奉明定國是之諭。舉國懽欣。先是。又草變科舉摺。亦為三篇。分交楊漪川。徐子靜上之。又草請派近支王公將

摺請開局譯日本書摺請派游學日本摺皆由楊沂  
川上之奉旨允行又為宋芝棟侍御請推舉經濟特  
科摺又盛宣懷借款八百萬歲息約三十餘萬無人  
敢言之乃請提其息為譯書學堂之費皆奉旨俞  
允於是學堂有款而舉特科者紛紛矣又為御史李  
成鐸草譯書游歷及明賞罰辦新舊摺李上之附片

即言勿用新進。蓋聞吾之召用也。人或謂其自相矛盾云。是時已定二十四日出京。適見家信云。粵中疫癘甚盛。學者皆散歸。宜遲歸。即歸亦當在上海少候。是日以國是既定。與其候於上海。不如少留京師。或更有補遺遲遲行。十五日忽為徐學士薦備顧問。奉旨着於十八日預備召見。廿七日詣頤和園宿戶。

部公所即見懿旨遂常熟令榮祿出督直隸並統三  
軍着二品大臣具摺謝恩並召見並令天津閱兵蓋  
訓政之變已伏於是知常熟之逐甚為灰冷廿八早  
入朝房遇榮祿謝恩同對與談變法事榮入對即劾  
吾辯言亂政矣榮祿下吾入對上問年歲出身畢吾  
即言四夷交迫分割存至覆亡無日上即言皆守舊

者致之耳。吾即稱上之聖明洞悉病源。既知病源則  
藥即在此。既知守舊之致禍。則非盡變舊法與之  
維新。不能自強。上言今日誠非變法不可。吾言近歲  
非不言變法。然少變而不全變。舉其一而不改其二。  
連類並收。必至無功。譬如一殿材既壞。敗勢將傾覆。  
若小小彌縫補漏。風雨既至。終至傾壓。必須拆而更

築乃可底託。然更築新基。則地之廣袤。度之高下。磚石楹桶之多寡。窗門楹櫺之潤窄。灰釘竹屑之瑣細。皆須全局統算。然後庀材鳩工。殿乃可成。有一小缺。必無成功。是殿終不成。而風雨終不能禦也。上然之。吾乃曰。今數十年。諸臣所言變法者。率皆畧變其。一端而未嘗籌及全体。又所謂變法者。須自制度法。

律先為改定乃謂之變法。今所言變者是變事耳。非  
變法也。臣請皇上變法須先統籌全局而變之。又請  
先開制度局而變法律乃有益也。上以為然。吾乃  
曰。臣於變之事嘗輯考各國變法之故。曲折之宜。擇  
其施行於中國者斟酌而損益之。令其可施行。章程  
條理皆已備具。若皇上決意變法可備採擇。但待推

行耳。泰西講求三百年而治。日本施行三十年而強。吾中國國土之大。人民之衆。變法三年。可以自立。此後則蒸蒸日上。富強可駕萬國。以皇上之聖。圖自強。在一反掌間耳。上曰。然。汝條理甚詳。吾乃曰。皇上之聖。既見及此。何為久而不舉。坐致割弱。上以目視簾外。既而歎曰。素掣肘何。吾知上礙於西后。無如何。乃



曰就皇上現在之權行可變之事雖不能盡變而扼  
要以圖亦足以救中國矣。惟方今大臣皆老耄守舊  
不能外國之故。皇上欲倚以變法猶緣木以求魚也。  
上曰伊等皆不留心辦事。對曰大臣等非不欲留心  
也。奈以資格遷轉至大位時精力已衰又多兼差實  
無暇晷無從讀書實無如何。故累奉旨辦學堂辦商

務彼等少年所學皆無之實不知所辦也皇上欲變  
法惟有擢用小臣廣其登荐予之名對察其才否皇  
上親拔之不吝爵賞破格擢用方今軍機總署並已  
用差但用京卿御史西官分任內外諸差則已無事  
不辦其舊人且姑聽之惟彼等事事守舊請皇上多  
下詔書示以意旨所在凡變法之事皆特下詔書彼

等無從議駁上曰然對曰昨聞奏章張蔭桓寶  
星何不明下詔書上一笑自劉台後民志已離非多  
得皇上哀痛之詔無以收拾之上曰然吾乃曰今  
日之患在吾民智不開故雖多而不可用而民智不  
開之故皆由以八股試士為之學八股者不讀秦漢  
以後之書更不考地球各國之事然可以通籍累致

大官。今群臣濟濟然無以任事變者皆由八股致大  
位之故。故台遼之割不割於朝廷而割於八股二萬  
萬之款不賠於朝廷而賠於八股膠州旅大威海廣  
州灣之割不割於朝廷而割於八股。上曰然。西人  
皆為有用之學而吾中國皆為無用之學故致此對  
曰上既知八股之害廢之可乎。上曰可對曰上既以

為可廢請上自下明詔勿交部議若交部議部臣必  
駁矣上曰可上曰方今患籌款如何乃言日本紙幣  
銀行印度田稅畧言其端既而思昭信股票方提為  
起行官若縱言其詳則未能变法先害民矣乃畧言  
中國鐵路鑛務滿地為地球所無若大舉而籌數萬  
萬編築鐵路練民兵百萬購鉄艦百艘徧開郡縣各

種學堂、水師學堂、船塢則一舉而大勢立矣。但患變  
法不得其本耳。中國地大物博、藏富於地、貧非患也。  
但患民智不開耳。於是言譯書、游學、派游歷等事。每  
終一事稍息以待上命。上猶不命起乃重提。徧及用  
人行政未及於推廣社會以開民智而激民氣並撫  
各會匪。因謝保國會被劾上為保全之思。上皆點首。

稱是又條陳所著書及教會事久之上點首云汝下去歇歇又云汝尚有言可具摺條陳來乃起出上月送之蘇拉迎問蓋對逾十刻時矣從來所少有也既退出軍機大臣面奉諭旨着在總理衙門章京上行走時李合肥謝恩同下面色大變對我歎惜謂榮祿既在上前而劾我又告剛毅上欲賞官勿予當予微

差以抑之上問振臣以位置吾時廖仲山將欲言請  
賞五品卿而剛毅班在前請令在總理衙門章京上  
行走蓋欲以辱屈我也於是發書告宋芝棟令其即  
上廢八股之摺蓋已早為草定者乃與幼博游西山  
既還將詣宮門謝恩以諸臣忌甚又無意當差於初  
一日乃具摺謝恩並再陳大誓群臣統籌全局開制



度局三義又陳請廢八股及開孔教會以行聖公為  
會長聽天下人入會今天主耶穌各立會長與議定  
教律凡有教案者歸教會中按照議定之教律商辦  
國家不與聞並進呈孔子改制考請聽沿邊口岸准  
用孔子紀年附呈列國歲計政要疏留中五月初五  
日奉明旨廢八股矣先是廿九日芝棟摺上上即今

樞臣擬旨。是日京師譁然。傳廢八股。喜色動人。連數  
日寂然。聞上得芝棟摺。即令降旨。剛毅請下部議。上  
曰。若下禮部。彼等必駁我矣。剛又曰。此事重大。行之  
數百年。不可遂廢。請上細思。上厲聲曰。汝欲阻撓我  
耶。剛乃不敢言。及將廢。剛毅又曰。此事重大。願皇上  
請懿旨。上乃不作聲。既而曰。可請知。故待初二日詣

頤和園請太后懿旨而至初五日乃降旨也百事皆  
如此上抗於西后下抗於頑臣變法之難如此及命  
下之日懽聲雷動去千年之弊政非皇上之聖武豈  
能若此之剛斷乎初三日總理大臣代遞謝恩摺上  
命曰何必代遞後此康有為有摺可令其直遞來又  
令樞臣廖壽恒來令即將所著日本變政記波蘭分

減記法國變政考、德國變政考、英國變政考、立即抄  
寫進呈。乃片陳謄當書夜編書不能赴總署當差。而  
告李合肥、廖仲山、張樵野以不能奔走此差辭之。向  
例總署章京由各部司員考取又覆試之其最高列  
者尚須一二年然後傳到。僅當譯電等差。有年乃轉  
司務廳也。又一二年者乃得派入各股。又數年乃可

升提調然後升幫辦總辦吾被特旨派差為向來所  
無入署即可派總辦提調知交多勸就之吾終不為  
屈也鄉會試既廢八股而用策論生童歲科試仍未  
改吾三月所上之摺交總署議而未行欲因勢並行  
之乃自草一摺為楊潯川草一摺又令卓如草一摺  
交宋芝棟上之奉旨允行於是歲科試均廢八股而

改策論矣。時八股士驟失業。恨我甚。直隸士人至欲  
行刺。于晦若至。屬吾養壯士。住深空。簡出游以避之。  
吾笑而不避也。時以愚民之害既去。當開民智。泰西  
文明多由於有製新器。著新書。尋新地之賞。初八日。  
上摺言之。奉旨交總署議。張樵野即屬卓如議稿。乃  
為議定。即令總署奏定章程。頒行天下者也。時新定

國是廢八股。舊黨甚沸。御史文暘、黃桂、鑒等奔走謀之。聚議將廢名。翻國是。復八股。乃草摺交楊濬川上之。請御門誓群臣。並定謗新政之律。其有敢請亂國是。復八股者。重懲之。於是上諭。再責舊黨謗謀。乃少息也。時許應騤議經濟特科。及廢八股。事多方阻撓。御史楊濬川、宋芝棟聯名劾之。上惡其阻撓科舉。即

定罷斥。剛毅乞恩不許。請令總理衙門查覆。不許。乃請令其自行回奏。上不得已允之。許應鑾夜走請於剛毅。剛毅屬其牽攻我可免。許從之。上重於為我故去大臣。故聽之。於是與洪嘉興、聶文滂劾宋楊而專意及我。軍機得文摺喜甚。以為必去我矣。上閱摺大怒。謂文滂受許應鑾指使。將革職。剛毅求之。乃令回原



衙門行走凡言官回郎署例不補缺不派差與革職  
無異也其摺誣甚非上之明吾不免久矣彼來吾八  
次而謂來二次彼摺皆倩吾作而攻宋楊倩吾作摺  
甚至謂吾盡棄名教保中國不保大清走胡走越後  
此偽辭皆緣此摺為定案也吾累年來京皆寓金頂  
廟入城多宿於是帶衾枕者以僧寮無是也文悌心

術詭詐彼留吾談而詢吾從僕曾訪樵野即以為吾  
宿樵野所樵野無端被禍實文悌妄指為之京師危  
疑之地可不謹哉以新定科舉事請採用朱子科場  
貢舉議分科試士令人習一經如詩一科書一科易  
一科儀禮一科禮記附春秋公羊穀梁一科左傳附  
之史記兩漢書一科三國晉六朝史一科唐五代宋

史一科。遼金元明史一科。國朝通志若會典東華錄  
十朝聖訓一科。經史各五科。四書則人人須通。西學  
則人專一門。普通之學以為論。有草一摺為徐學士  
草一摺奉旨。禮部議為所駁。附片請將優拔貢改試  
策論。並請凡朝殿試勿尚楷法。得旨允行。時大學堂  
已定。吾乃上摺於各省開高等學堂。各府開中學。各

縣開小學撥各省善後款及各規費以充學費並請  
廢天下淫祠以其室宇充學舍以其租入供學費卅  
一日奉旨允行於時各直省蒸蒸爭言開學矣吾以  
鄉落各有淫祠皆有租入故欲改以充各鄉落學舍  
意以佛寺不在淫祠之列不意地方無賴藉端擾挾  
此則非當時意料所及矣

時上頻命樞臣催所著各國變政書，乃晝夜將日本  
變法考加案語於其上。凡日本事自明治元年至二  
十四年，共十二卷，更為撮要一卷，政表一卷，附之。每  
日本一新政，皆借發一義於案語中。凡中國變法之  
曲折條理，無不借此書發之。兼賅詳盡，網羅宏大。一  
卷甫成，即進上。上復催，又進一卷。上以皆日本施行

有效者。聞之甚喜。自官制。財政。憲法。海陸軍。經營新  
疆。合滿漢教。男女。改元。遷都。農工商鑛各事。上皆深  
然之。新政之旨。有自上特出者。每一旨下。多出奏摺  
之外。樞臣及朝士皆茫然。不知所自來。於是疑上諭  
皆我所議擬。然本朝安有是事。惟間日進書。上采棄  
語。以為諭旨。六日。進波蘭分滅記。列國比較表。七日。

進法國變政。及其德英二國變政。考至八月上而政  
變生矣。自召見後。無數日不進書者。朝士不知進書  
輒疑摺函中累累盈帙。故生疑議也。自四月杪大學  
堂議起。樞垣託吾為草章程。吾時召見無暇。命卓如  
草稿。酌英美日之制為之。甚周密。而以大權歸之教  
習。終署覆奏學堂事。大臣屬之章京。章京張元濟來

請吾撰吾為定四款一曰預籌巨款二曰即撥官舍  
三曰精選教習四曰選刻學書選刻學書者將中國  
應讀之書自經史子集及西學選其精要輯為一書  
俾易誦讀用力省而成功普不至若曠昔廢力於無  
用之學以至久無成功也又所請各分教習皆由總  
教習專之以一事權時派大學士孫家鼐管學孫家



飛素知吾來西請吾為總教習并請次亮為總辦又  
來勸駕時大學肄業有許曹翰林道府州縣等官習  
氣甚深自度才德年位恐不足以率之度教無成徒  
增謗議故面辭之時孫尚未睹卓如章程也時李合  
肥樞臣廖仲山陳次亮皆勸孫中堂請吾為總教習  
及見章程大怒以教權皆屬總教習而管學大臣無

權。又見李合肥廖仲山陳次亮皆推數疑我為請託。  
欲為總教習專權。又欲專選書之權以行孔子改制  
之學也。於是大怒而相攻。我遂命卓如告孫誓不沾  
大學一差。以白其志。時承保國會之餘。孫瀨誣攻之。  
後参保國會之潘慶瀾。又孫之親戚也。又有謠詠於  
孫之前者。孫於是大有惑志。始孫願言變法與編修。

蒯光典言曰。今朝士忠肝熱胆。而心通時務者。惟康  
某一人耳。若皇上責我變法。我惟舉康某人。我則不  
能其相待若此。至是相攻。謂吾孔子素王。汝乃自為  
教王民主。於廿九日上摺劾孔子改制考。并謂康某  
才氣可用。以為宜如漢文之待賈生。老其才。折其氣。  
而後大用之。上令軍機大臣傳旨。與孫家鼐。令孫家

龍轉傳旨與我而已。並不明降上諭。蓋我已將孔子  
改制考進呈。並無少妄。早鑒在帝心也。時廣東學政  
內閣學士張百熙奏荐我經濟特科。又奏保使才。不  
識其人。亦不知其事也。時網羅天下人才。及同門才  
者。交諸公奏荐。陝西劉古愚皆為推轂。時八股已廢。  
報會紛紛。學堂大開矣。六月一日。乃上商務一摺。請

令十八省各開商務局。先在上海廣東善堂中公舉  
通達時務殷實商人試辦。限兩月內草定章程。呈  
署進呈御覽。荐上海經元善嚴作霖為總辦。廣西龍  
澤厚副之。奉旨交各直省督撫議行。廣東商務局七  
十二行即舉何穗田為總辦。以知新報曾言商務章  
程也。儀侃頻書來促章程。事忙甚。令儀侃孝實議之。

時潘行桐等欲攘商務局事。適岑雲階放廣東布政使。乃以何穗田託之。時時務報汪康年盡虧巨款。報月零落。恐其敗也。乃草摺交宋芝棟上之。請飭卓如專辦報。並請選擇各省報進呈。奉旨交孫家鼐議。時拒臣相惡。欲藉差擠我外出。然後陷之。乃託孫家鼐請我辦官報。並以京銜及督辦字樣相誘。吾卻之。當

是時舊党謠言充塞皇上無權  
諸上重病已豫大行衣衾棺槨諸人皆為我危勸我  
勿預政事幼博則專意在廢八股自八股廢後民智  
大開中國必不亡上既無權必不能舉行新政不如  
歸去選港中西文學者教以大道三年當必有成然  
後議廢政救中國未晚也日以為言每當上摺必阻

撓之謂辦此瑣事無謂日與卓如言之時榮祿出天  
津條陳辦事情形有摺上太后而無摺上皇上此本  
朝人臣所未有也榮祿素結李聯英以媚太后故迎  
合李聯英以輕皇上至是出統三軍謀定於天津開  
兵而行廢立故敢無君至此上怒而傳旨申飭榮祿  
奏荐三十餘人上無一召見無一用者有要人告我



曰我請皇上召見榮祿凡三上矣上未嘗一召見上  
之惡榮祿深矣是時榮祿曰攻新政而太監內務府  
等諂攻皇上無所不至幼博言之甚切我則曰死生  
命也我昔經華德里飛磚掠面若逾寸中腦死矣假  
中風痰頃刻可死有聖主在上吾以救中國豈忍言  
去哉幼博又曰伯兄生平言教以救地球區區中國

殺身無益。凡言此者屢矣。至是辭官報事。孫家鼐將  
仍歸之。汪康年卓如慮其顛倒是非也。故請我領之。  
吾亦以朝局危疑。欲藉此以觀進退。乃許之。初八日。  
孫家鼐入奏。奉旨令督辦其事。吾具摺謝恩。條陳請  
令武備文官教職以上及諸生閱看。並請定報律。時  
吾適書選摺。及有所傳旨。皆軍機大臣廖仲山傳之。

京師謠言皆謂廖為吾輩帖式甚至有謂為康狗者  
廖避之乃面奏謂官報事宜令我商之孫某並傳言  
謂此後凡報事皆交孫家鼐遞摺先由軍機大臣傳  
旨與我今告知孫家鼐乃見孫家鼐為之草奏云某  
月某日康某轉傳軍機大臣面奉諭旨此也可笑事  
也孫某再三挑剔卒用我言奉旨俞允并令我定報

單本作諭旨聲  
明原面奏此事

單本塗去

律而諭旨聲明孫家鼎面奏蓋專為避嫌計也時正  
月所上制度局之摺京師傳之御史楊漪川宋芝棟  
李木齋王鵬運學士徐子靜皆以制度局為然我為  
各草一摺於五月時今日而上皆制度局之意也楊  
漪川宋芝棟亦奏請御乾清門以誓群臣皆為剛毅  
所阻時言新政皆小臣耳無大臣言之者於是卓如

為李泌園草摺陳四事一曰御門誓群臣二曰開懋  
勤殿議制度三曰改定六部之則例四曰派朝士歸  
辦學校乃下之慶親王及孫家鼐議拒垣最惡御門  
及懋勤殿事屬慶邸及孫家鼐阻之上乃推問我總  
署正月制度局之摺西貢張蔭垣馬總署以事關重  
大派軍機王大臣會議既會議以教行游辭殿之上

發還令再會議。殊批責以無得浮詞搪責。倘仍敷衍塞責。定必嚴辦。向例非有重大事。無出殊批者。至是咸悚懼。我請於京師開十二局。外省開民政局。於是流言紛紜。咸謂我盡廢內閣六部及督撫藩臬司道矣。故張元濟請翰林院都察院。岑春煊請廢御史。裁局員。皆歸之於我。於是京朝震動。外省悚驚。謠謠不

可聽聞矣。軍機大臣曰：開制度局，是廢我軍機也。我  
密忤旨而已。必不可開。王文韶曰：上意已定，必從康  
言。我全數之，則明發上諭，我等無權矣。不如畧數行  
而行之。王大臣皆悟，咸從王言。遂定議所云。誓群臣  
定國是一條，以為詔書兩下。國是已久定，此條可無  
庸議。我所請選天下通才二十人，置左右，議制度一

一條乃改為選翰詹科道十二人輪日召見備顧問  
於是制度局一條了矣我所請令臣民咸得上書一  
條改為職官遞本衙門士民遞都察院我所請開法  
律局定為每部派員司改定律例夫員司無權無才  
無從定之又非採集萬國憲法與我本意大相反矣  
學校局一條則以大學堂及各省中小學堂已經奉



旨另辦了之。農工商局則以屢奉前旨飭辦了之所  
謂起民兵以練陸軍。購鉄艦以成海軍。則以裁兵併  
餉等旨了之。我所請民政局則擬旨令督撫責成州  
縣妙選人才了之。惟令開一鐵路礦務局請即在總  
理衙門派人辦理。於是所議我摺似無一語駁者。似  
無一條不行者。上亦無以難之。雖奉旨允行。而此摺

又皆成為靈文矣。大官了事所謂才者如此。雖輕舟  
已過萬重山。而惡我愈至。謗言益甚。然七月令人人  
上書之事。羣臣紛紛召見。乃至道府專摺。州縣遞奏  
及制度局懋勤殿之事。皆出於此。然點禮部六堂以  
名榮祿之變。亦萌於此矣。時編書未畢。未能出京。及  
辦館譯書事。擬先遣幼博出京。先是上摺請開農

工局並進呈農學圖奉旨派端方吳懋鼎徐建寅辦理端方者剛毅之私人但為骨董之學者也徐建寅者裕祿之人也吳懋鼎者王文韶之私人也惟徐建寅願游外國餘皆非能辦事者是以各督撫皆藐上無權抗不遵辦於是心力稍倦吾亦決意出京矣時奏派狄平接辦報事而汪康年私改為昌言報據而

不交乃與孫家鼐面商請在京師開局孫承樞垣意  
欲擠我不願其留京師也仍屬往上海乃電江西布  
政使翁曾桂兩江總督劉坤一兩湖總督張之洞湖  
南巡撫陳寶箴浙江巡撫廖壽豐並令劉坤一勒令  
汪康年交出無得抗旨劉坤一立即電奏奉旨令出  
使日本大臣黃遵憲過滬查辦劉坤一得旨即電上

海道蔡鈞封禁昌言報江西亦飭禁以報事查辦後  
留京時湖南巡撫陳寶箴奏荐我而改制考上留  
中是時王先謙歐陽節吾在湘猖獗大攻新黨新政  
學會學堂一切皆敗於是草摺交楊蔭川奏請獎勵  
陳寶箴上深別白黑展旨責湖南舊黨仍獎陳寶箴  
認真整飭楚事乃怡然非聖明洞燭萬里何能如是

又請親試京僚，黜其不通者。然朝士之冗闇者大恐，  
剛毅阻之卒不行。時譚鍾麟不行新政，又縱盜賊，草  
摺交宋芝堞劾之，奉旨交陳寶箴查辦。先是為文悌  
草摺劾雲貴總督崧蕃貪誣革職焉。時萬壽請頒御  
像，下愛民詔書，以結民心。刊新政詔書，謄黃遍貼窮  
鄉僻壤，以廣德意。停止昭信股票，或作為公債，交回

本地方起農工商之業以惠民困利源資及昭信股  
票事皆奉旨允行昭信股票官民至其富商小戶無  
得免者至是皆得昭蘇同日上禁天下裹足摺請獎  
勵各省不纏足會令各省督撫飭地方官勸誘士庶  
仿照上海不纏足會例推行並定律光緒十五年所  
生女子至今十歲者無得裹足若有裹足者不准領

受封典。諸臣以職。屑不關政體。沮尼不行。時徐致靖  
學士請開編書局於京師。存我編萬國強盛弱亡之  
書。及制度風俗之事。剛毅沮之。謂大學堂已有編譯  
局。可無庸另開。遂不行。當萬壽後。進波蘭分滅記言  
波蘭被俄奧分滅之慘。士民受俄人荼毒之酷。國王  
被俄人控制之害。守舊黨遏抑之深。後國王憤悔變



法俄使列兵禁制不許變法卒以割亡哀痛言之上  
覽之為之唏噓感動賞給編書銀二千兩七月初四  
日總理衙門傳言來謂當有旨到命勿出門既而章  
京李岳瑞來口傳諭旨即令僕人將賞銀捧出倉卒  
拜受此本朝未有之舉不知何以報也時應詣宮門  
謝恩以上未降明旨知有曲折恐為太后所忌故亦

不敢詣宮門請對。但具摺謝恩。於摺末極陳時變之  
急。分割之苦。新政變而不變。行而未行之無益。制度  
局不開。零星散雜之無裨。末復舉波蘭事。反覆言之。  
摺凡數千言。於是上大感動。從此大發雷霆。非復曩  
時之迂迴矣。時七月十二日也。附片辨孔子制度考  
事。辨孔子稱王為歷朝封典。非自我創造。事自上此。

摺後以制度局未開不復言事矣然修英德變政記  
日無暇晷是時既許群臣上書大臣多有抑遏之者  
禮部主事王照條陳請皇上東游日本痛抑守舊一  
摺尚書許應騷懷塔布擲還不肯代遞幼傳以為皇  
上明日達聰廣開言路豈容大臣阻蔽不達謂刻之  
小航性勇直即具摺彈劾堂官時侍郎堃岫溥頤在

堂令掌印者勿收。小航懷之而出。謂將逸察院兩堂。  
乃許代遞。而許應騷遂劫小航。妄請乘輿出游異國。  
陷之險地。日本素多刺客。昔俄太子出游。及李鴻章  
奉使。皆遭毒手。王煦既用心不軌。故臣等不敢代遞。  
乃敢登堂咆哮。然上聞我所進俄大彼得變政記。已  
極以親游外國為然。乃降旨責禮部六堂。蔽塞言路。

並云親游外國之舉朕躬自有權衡無煩大臣臆  
過慮交部嚴諫部議降詔上怒其不遵旨盡褫  
懷塔布許應騫左侍郎望岫徐會澧右侍郎溥題曾  
廣漢六堂之職而令羣僚封章直遞又令各直省道  
府自行遞摺各州縣交替換代遞上諭謂藉覘中國  
人之才識自是我朝臣民上書之說乃始行於是群

僚士庶情意疎通奔走輻輳以報聖主各衙門每月  
摺數十件厚或盈寸上鷄鳴而起披覽章奏至於日  
昃不盡體裁踏雜上并不責問至有野民漁人上書  
紙用二尺長條稱及皇上亦不抬頭上亦一笑置之  
又有詆上變亂祖法自稱開創置祖宗於何地者振  
臣欲罪之上亦謂當廣開言路之時不必有所譴責

以塞之。其寬大求言如此。於是廣開養賢之路。荐剋  
交於公車。上每日輪召見之。必問其通時務與否。給  
事中丁之斌不能答。則面責之。令其講求中外之故。  
其稱旨者立行擢用。於是台諫詞館移風。皆爭講求。  
又以爭上條陳。京師西書為之一空。外省八股已廢。  
改試時務。學堂學會遍地。並起事講萬國之故。守舊

者知上風旨已定亦不敢有他言於是作新之風氣  
幾定矣。上以樞臣老耄守舊而又無權去之乃專用  
小臣特加侍讀楊銳主事劉光第中書林旭知府譚  
嗣同以四品卿銜為軍機章京參預新政上以無權  
用人為大臣故名為章京特加參預新政四字實宰  
相也。即以群僚所上之摺令四人閱看擬旨於是軍



機大臣同於內閣實伴食而已。有湖南舉人曾廉上書請殺吾及卓如。上特發文譚嗣同擬旨駁之。又傳我密諭令林旭帶出。蓋上之用林旭以其奏摺稱師知為吾門生。上之用譚嗣同以其與我同為徐學士及李慈園尚書所荐。皆吾徒也。故拔入樞垣。楊慶為楚撫陳寶箴所荐。而陳寶箴曾荐我。楊蔭川又曾保

陳實歲上亦以為皆吾徒也。而用之時譚復生實館  
於吾林。噉谷亦日日上。意有所欲傳。吾有所欲白。  
皆籍譚林通之。時李蕊園尚書奏荐甚力。上以忌西  
后。未敢顯然用。故用譚林。楊墨代之。上之意極苦矣。  
時奏摺繁多。無議不有。汰冗官。廢御寺之說尤多。上  
決行之。樞臣力諫不獲听。且曰。康有為並請廢藩臬。

道府何為不可而吾向來論改官制但主增新不主  
裁舊用宋人官差並用之法如以尚書翰林同直南  
齋侍郎編修均兼學政親王京卿同任樞垣總署提  
督千把同作營官專門差使不拘官階故請開十二  
局及民政局選通才以任新政存冗官以容舊人軍  
機大臣廖仲山聞我論託人來請我言之吾乃草摺

言官差並用之制引唐宋為法舉近事為例乃言方  
今官制誠不可不改然一改即當全改統籌全局如  
折漕之去漕運抽漕之去鹽官尤為要義也上即大  
裁冗教鄉寺及雲南廣東湖北三巡撫及各道各局  
並及漕運而後不肯裁漕而新局之置上將有待也  
廖乃各我將請吾諫止裁官而吾請全裁蓋上於變

政勇決已甚也。又左右無人顧問。議論故風利不得泊也。吾以古者皆有散大夫以備諷議。蓋有行政之人而無議政之人。古今亦無此政體。乃請置三品散卿。三品散學士。草摺交徐子靖侍郎上之。時禮部六堂易人。上擢李茲園倉督為禮部尚書。王少詹錫蕃為左侍郎。徐學士為右侍郎。內閣學士

潤普通武嘗上疏請議院上本欲開之吾於日本變  
政考中力發議院為泰西第一政而今守舊盈朝萬  
不可行也上然之然雖不用潤言猶拔為禮部侍郎  
上於言必酬如此知人之明鼓勵維新莫不頌我聖  
明也時章交公車上尚慮天下人才未盡達令天下  
士民有欲上書者即交本籍州縣上於是天下欣欣

莫不吐露於聖主之前。此則三代懸輅設鐸所未及也。時言者雜沓無所不有。上於其可者立予施行。時復生力欲荐吾入軍機。吾自避。徐學士力欲荐吾直懋勤殿。吾因為行新法不為富貴。又以觸西后之忌。辭之極力。而君者猶強牽不已。時吾觀復生及林墩谷之相。謂卓如言曰。二子刑法皆輕。不類開國功臣。

也。今茲維新開中國四千年大局，負責非常，而二子起布衣而驟相，恐禍將至矣。昔何晏鄧颺執政而管公明謂其鬼幽鬼躁必及於難，吾今懼矣。以徐瑩甫及徐毅甫形相甚好，可入軍機，謂卓如福氣過人，或可消弭。並欲為沈子培奪情，舉吳德浦小村及孺博數人。又留黃公度勿出。於時復生暇谷又欲開議院。



吾以舊黨盈塞力止之而四卿亟亟欲舉新政吾以  
制度局不開瑣碎拾遺終無也故議請開懋勤殿以  
議制度草摺交令宋芝棟上之舉黃公度卓如二人  
王小航又上之舉幼博及瑞博二徐並宋芝棟徐學  
士亦請開懋勤殿又竟荐我復生芝棟召對亦面奏  
請開懋勤殿上久與常熟議定開制度局至是得諸

臣疏決意開之乃令復生擬旨並云康熙乾隆咸豐  
三朝有故事飭內監捧三朝聖訓出令復生檢查蓋  
上欲有所據以請於西后也先是語復生以上無權  
榮祿不臣復生不信至是乃悟是日擬旨樞垣傳出  
京師咸知開懋勤殿矣是日七月二十八日也是時  
以天津閱兵期迫收兵權則恐警覺不撫將帥則恐

不及事日夜憂危復生至是知上果無權大恐懼吾  
於是連日草請仿日本立參謀本部選天下虎羅之  
士不二心之臣於左右上親擐甲冑而統之又請改  
維新元年以新天下耳目又請變衣服而易舊黨心  
志又請遷都上海借行幸以定之但率通才數十人  
從辦事百官留守即以棄舊京矣力言舊京旅大膠

威門戶盡失。俄人屯重兵於旅順。扼吾之吭。無可守  
矣。又北京連年水災。城崩。屢次塵土。至天泉惡脈壞  
王氣已絕。又旗人環擁。舊黨彌塞。下則市僧吏胥中  
則瑣例繁雜。種種皆亡國之具。不易掃除。非遷都避  
之。無俾易種新邑。不能維新也。借行幸舉之。則定天  
下於無形。精選參謀部之兵才武之將。以師兵缺艦

為營衛居於上海通達之地以控御天下其於新政  
最便上皆然之先是慮九月天津開兵即行廢立夙  
夜慮此友朋多勸吾避居日本以待變吾不忍以將  
帥之中袁世凱夙駐高麗知外國事諄變法昔與周  
辦強學會知其人與董彞一武夫迥異擁兵權可救  
上者只此一人而袁與榮祿密慮其為榮祿用不肯

從也。先於六月令徐仁祿毅甫游其幕與之狎以觀  
其情。袁傾向我甚至謂吾為悲天憫人之心經天緯  
地之才。使毅甫以詞激之謂我與卓如芝棟復生屢  
奏存於上。上言榮祿謂袁世凱跋扈不可大用不知  
公何為與榮不洽。袁恍然悟曰昔常熟欲增我兵榮  
祿謂漢人不能任握大兵權。常熟曰曾左亦漢人何

嘗不能任大兵然榮祿卒不肯增也。嚴嵩歸告知袁  
為我所動。決策荐之。於是事急矣。先是為徐學士草  
摺荐袁。請召見。加官優獎之。又交復生遞密奏。請撫  
袁以備不測。上即降旨召袁。世凱廿九日至京師。而  
是日上召見於頤和園。交密詔與楊銳帶出。稱朕位  
且不保。令與諸同志設法密救。初一日袁世凱降旨。

嘉獎賞給侍郎初二日明詔敦促我出京於是國人  
駭悚知禍作矣以向例非大事不明降諭旨有要事  
由軍機大臣面傳諭旨而已至逗遛促行一事非將  
帥統兵逗撓無明降諭旨之理况吾為微官報亦小  
事何值得明發上諭既嚴責駝吳便當革職何得謂  
欲得通達時務之人與商治法開康有為素日講求



反與獎語耶。又上召見臣工無煩有明乃聲明召見  
一次亦從來未有之事。故國人皆曉然。上復恐吾疑  
惑。召見林旭。令其持密詔交出。先是有懷塔布既默  
李鴻章敬信亦撤去總署差。蓋臣惶駭內務府人皆  
環跪。后前謂上妄變祖法。請訓政。后不許。立山等乃  
皆走天津。謁榮祿。請廢立。旗人冠蓋相望。御史楊崇

伊亦榮黨也。草摺請訓政。出示榮祿。榮祿許之。令楊  
崇伊持摺見慶邸。而面商之。慶邸與李鴻章皆跪請  
西后訓政。立山等至。謂上派太監往各使館請去。西  
后西后大怒。故上自八日還海。請懋勤殿。都人士方  
側望。而密詔遽下。榮祿見袁世凱被召。即調轟士成  
守天津。以斷袁軍入京之路矣。謂董福祥軍密入京

師以備舉大事。揚崇伊於初二日至頤和園。逸請訓  
政摺。而後意定。上欲保全我。故促我出京也。是夜未  
見旨。飲宋芝棟家。李蕊園尚書徐子靖侍郎在我左  
右。唱崑曲極樂。而聲帶變徵曲。終哀動。談事變之急。  
相與憂歎。自是夕與二公遂不復見矣。既而歸。見敦  
促出京之旨。又見歐谷留書云。來而不遇。屬明日勿

出有要事告初三早嗽谷持密詔來跪讀痛哭激昂  
革密摺謝恩並誓死救皇上令嗽谷持還繳命並奏  
報於初四日起程出京并開用官報關防廿九日交  
楊銳帶出之密詔楊銳震怒不知所為計亦至是日  
由林曠谷交來與復生跪讀痛哭乃召卓如及二徐  
幼博來經畫救上之策袁幕府徐菊人亦來吾乃相

與痛哭以感動之。徐菊人亦哭。於是大眾痛哭不成  
聲。乃屬譚復生入袁世凱所寓。說袁勸王率死士數  
百扶上登午門。而殺榮祿。除舊黨。袁曰。殺榮祿乃一  
狗耳。然吾營官皆舊人。槍彈火藥皆在榮祿處。且小  
站去京二百餘里。隔於鐵路。慮不達。事洩。若天津閱  
兵時。上馳入營。則可以上命誅賊臣也。幼博早已

料之矣。復生入城後，車如至金頂廟，客純齋處候消息。吾稍發書料行李。是日盡卻客。及夜，楊潯川、宋芝棟、李孟符、王小航來慰。揚言京師市人皆紛紛傳八月京師有大變，米西皆騰貴，並董軍紛紛自北門入。居民震恐，乃有紛紛遷避者。李孟符言英人有七艦在大沽，將與俄戰。吾未與諸公談密詔事，而以李提

摩太交來瓜分圖令諸公多覓人上摺令請調袁軍  
入京勤王。至子刻內城開吾亦入城至金頂廟候消  
息知袁不能舉兵扶上清君側無如何乃決行。聞五  
日袁召見上另有密詔與袁則不知其云何矣。聞袁  
知變不奉命云容純甫欲請美欽使然以其無兵無  
濟於事却之。天將明乃睡九點鐘起訪李提摩太與

謀英公使亦避暑北戴河遠出無能救者。又惡假權  
外人故見伊藤博文而不請救援但請其說太后而  
已。既夕出城而見南海館居室牆傾覆心竊怪之矣。  
黃仲弢餞我戒以事變作榮祿將謀害我勸易裝出  
山東勿經天津歸則暇谷來言英俄已開仗是夕太  
后還宮以為外患方殷或稍紓內憂稍為安心不知



榮祿之詐言也。車如幼博咸勸我徹服行。吾以死生  
有命聽其然。乃留幼博與卓如謀救上而獨携李唐  
於天未明時出京。令幼博帶行李。遲日乃出。幼博送  
我至門。遂永訣矣。車中猶思仲致言或為山東之念。  
卒以死生有命故。決出天津不顧。至蓟直抵塘沽。即  
登招商局之海晏矣。以無票不許搭客。遂乃入官船。

以其初六日四下鐘乃開。惡久滯船中，忽思另搭客棧人，嘖有煩言。挑夫亦重索價，唐亦謂可勿回。意既決，遂運行李還入店，浴於浴室。至初六早，搭太古之重慶輪，十一下鐘乃動輪。既去天津，無恙亦無戒心矣。過煙台，購梨及石子。初九日抵滬，兩點鐘將入吳淞，出船頭眺覽，有新江貢生姚祖義以其所上書來。

示因與議論而船中莫不知吾者忽有英人來問君  
為康某乎其人固不識面者姑應之英人即入一室  
出照相相視曰此君之相乎曰然問曰君在北京曾  
殺人否笑曰吾安得為殺人事何問之奇也英人手  
出其上海道蔡鈞一書抄白偽上諭一道云吾進紉  
丸裁上即密拿就地正法覽畢眩然哭英人曰汝有

進九裁上事否。即寫諭與之。並哭言其故。英人曰。我  
英人濮蘭德也。我領事固知君是忠臣。必無此事。且  
向知汝之聯英惡俄。特令我以兵船救君。可速隨我  
下輪。事不可遲。恐上海道即來搜船。乃隨之下小輪。  
時聞上裁又不知英人如何。痛不欲生。即預為蹈海  
計。即口占一絕句。忽灑龍泉。翳太陰。紫微光。擗帝星。

沈孤臣專負傳衣帶碧海青天夜夜心乃草與家人  
遺書及與諸弟子書及與徐君勉一書以家事託之  
匆匆數言交李唐密藏之濮蘭德見吾哀哭慰之曰  
上太行尚無確信但傳聞耳可待之可少節哀至英  
兵艦旁之公司船即函電澳門知新報陳儀侃劉孝  
寔何德田告無恙屬其我家人又電雲衢書屋萬木

草堂屬即移家澳門。英領事班德瑞來見，取回船中行李交來。次日，總領事璧君來見，並送行而上海道連日搜船追問，英領事甚急。既知救在英船，派人來則船主不准登船。上海道又派兵船二艘來，英人又派兵船二艘夾護之。仍慮有變，先調威海衛之大鐵艦來護送。是艦方上煤，聞電即行。艦至為十二日矣。

乃動輪兵艦咸備戰具。護至福州。道無中國兵艦。乃還。時在滬上。託濮蘭德交大同譯局各書。皆云局中無人矣。十四夕。到香港。何曉生即同英港督所派之輔政司波君。總巡捕梅君來迎。蓋璧領事先有電告之也。居英巡捕房。有第四弟來見。知家人已到澳。而老母未來。憂思甚矣。十五日。張夫人自澳來見。知母

適從港到澳。以畏風浪不來。十六日。母來抱膝跪哭。  
幸脫虎口。獨念二叔父介藩公。以及二婢四妹並家  
岡眷屬。乃託陳維昭往訪。繞過三水迎之。時逮捕嚴  
急。親友皆不敢行矣。先是吾以五日行。僞臨朝六日。  
廢上。午命步軍統領崇禮率緹騎三百圍吾所居南  
海館。捕幼博及門人程式穀子良。錢維驥君白並僕



人王升王貴田叔以去。是時幼博入廁。本可避矣。館長班恨幼博當責之。帶兵往搜。遂及難車。騎塞米市胡同口。觀者如山。三人各乘一車。至步軍衙門。訊吾何往。答以已去天津。乃拘在押官員之監房。尚有一床一桌。錢維驥流涕震恐。欲尋死。幼博反從容言笑以解之。是時聞交刑部。程式教曰。吾等必死矣。幼博

曰汝年二十餘我三十餘不愈於生數月而死數歲  
而死者乎一刀而死不愈於久病歲月而死乎若死  
而中國能強死亦何妨子良曰外國變法前者死後  
者繼中國新黨寡弱恐我等一死後無繼也幼博曰  
八股已廢人才將輩出何患無繼哉七日四點鐘一  
卒提幼博交刑部而於次日釋子良君白及諸僕刑

部堂官親訊問吾何在答以已出天津謂何以私逃  
答以我奉旨敦促經奏報初四日起程並非私逃堂  
官曰汝兄不來必不釋汝必寫信令汝兄來方釋汝  
云獄中飯食及鋪蓋皆獲生與贊候任之也聞南海  
館既不得以文梯奏劾我曾宿張樵野所緹騎遂圍  
張宅刑部主事區震適在焉誤以為我捕之去既乃

釋之。想野遂因此下獄。國張宅不得七日榮祿入京。  
遂發兵三千閉城門。斷鐵路。大搜凡吾知識之人多  
見累者。京師搜不出。則大搜天津塘沽客棧。並停一  
切輪船。大索。並發電煙台上海搜船。電廣東拿辦家  
屬。於是查知吾搭招商局船而獲。因改搭重慶。即發  
飛鷹快船追捕。飛鷹者。新購自德國。每點鐘能行三

十海里、速率倍於重慶、追可必至、而船長以煤盡中  
道、返、遂下獄。或曰、船長義士也、煤能返津、即可采滬、  
其出於仗義也。卓如與復生謀所以救我者、皆以為  
必無生理矣。復生促卓如入日使館、姑請伊藤設法  
救之。伊藤博文聞而頓足、電滬中日領事小田切、然  
無能力也。時捕卓如甚急、復生乃勸卓如東行、而自

誓就死。卓如遂以七日行。時京津間風聲鶴唳處處  
皆傳吾所在。捕搜嚴急。誤以卓如為我。聶士成至親  
帶隊出搜捕者。既登舟。強索護送。之日領事鄭永昌  
亦失色。無以答之。卓如擁中國被草家書。危甚。幸去  
海岸僅十餘里。聶士成兵至。則日艦已先列隊護之。  
登舟。雖再三索問。日人拒之。僅乃免。是時上幽南海。

瀛台中王。小航與日人謀。踰南苑。救上。譚復生與京  
師俠士。大刀王五。亦謀救上。皆未及事。九日。譚復生  
被捕。小航被逮甚急。日人勸之東行。遂以十日行。八  
日。楊蔣川。遞摺。請偽臨朝。勿訓政。遂被逮。昔鄧壽奏  
請王莽。歸政漢室。退就臣列。其意不可及。今蔣川復  
類之。然鄧壽不死。王莽真大度哉。嗚呼。蔣川可謂古

之遣直矣。九日早，逮捕楊叔嶠在床未起，單起就縛。  
林旭入直，就縛。劉光第、徐子靜聞捕，乃自投獄中。是  
日，緹騎遍地，人人震懾。時又欲捕保國會，則株連徧  
天下矣。朝士紛紛恐及禍，多避而南下。鐵軍輪船擠  
擁甚，各直省聞之，亦慮會事株累，又傳聞上已有不  
測，各國紛紛調兵，咸恐懼國變，或奔走避匿，有若大



亂者。十一日。下偽旨。謂吾結黨營私。餘免株連。以安衆心。而樵野出教軍台。有六日後。言官揣摩希旨。爭以攻劾新黨新政為事。張仲忻於六日首劾我而黃桂鑒請先殺六人。無貽後患。十二日。兩點鐘。刑部正堂開堂訊問。偽旨命軍機大臣榮祿剛毅王大韶廖壽恒會訊。忽傳偽命。不必審訊。即行正法。四下鐘。某

市口行刑觀者如堵。幼博先就義。欲有所語。而左右  
顧盼無一人。五君子以次從容赴難。嗚呼痛哉。幼博  
就義時。衣短衣。南海館長班張祿既得吾衣物。乃為  
縫首巾。棺葬於南。下窆龍瓜槐觀音院旁。立石樹碑。  
曰南海康廣仁之墓。九月一日。陳士廉介叔曾冒險  
難走京師。夜視之。歎起運難。而運者嚴密。未竟而還。

是役也。梁元理同行。至津而歸。介叔慕義。蹈險。真古  
之人也。幼博才。斷絕人。方就官主事。上條陳言。改元  
遷都事。王小航疏荐於朝。上聞。憇勤殿。十人名單。傳  
聞。有幼博名。後以西后有變。衣帶詔出。事不果。幼博  
之才。一不展用。年僅三十二。無子。遺一女。名曰同荷。  
八齡耳。老母在堂。吾遂折翼。竟以吾故。致家大戮。白

骨不歸痛可言耶政變之獄一以文悌之摺為案據  
先是四月大閱吾與幼博出西直門視之還游極樂  
寺入西直門經文悌之宅吾順與幼博訪之後文悌  
直入室來視吾疾幼博陪之與論愛科舉數言文悌  
勅吾竟奉及幼博名自是京師無不知幼博者謠諑  
之興乃至謂幼博出入均廷曾有乾清宮門遇之者

展轉傳述或信為真故舊黨洩憤遂及大戮而楊潞  
川亦以文牋劾之有不可告人一語遂至京朝謠言  
滿聽吾及潞川之禍皆出於此張無野之萬里軍流  
亦為吾夜宿一言詩云譏人周極交亂四國又云取  
彼譏人投畀豺虎豺虎不食文牋之險敵有之詩人  
所以痛絕之哉極樂寺耶懷懷心目極哀出之達此

鞠凶先君之躬惟我二人吾今孑然愛愛何以為生  
耶

當初六月間慶卓如電上海瑞博告慶上海於七月

得電楚卿雲樵為吾與日本更東時報館人設法救

我而汪穰卿告上海縣引捕役來大局局及卓如之

家逮捕乃皆走避初八日陳子襄電廣州公善堂屈

謀之時吾築室花埭。謀之夜渡江來吾家告變而不  
欲明言。然時以吾為必死矣。舉家飲泣。謀之竟夕坐。  
俟檢拾行李。至九月五更。舉家下舟。是日為禮拜港。  
澳輪不開。十日乃下澳船。船甫開。逮捕吾家之兵即  
至。蓋譚鍾麟亦於八月接電。城內則已於八日夜到。  
雲衢書屋矣。不得吾家人。故九月侵曉而來也。兵役

來大掠捕看屋三人去。吾電發已遲。若無子復之。電  
及謙之適在。而謙之之勤之也。家人皆被逮矣。又幸  
適築花埭新屋。若仍居雲橋書屋。則在城中夜間。謙  
之無從飛至。亦無從飛出。早及於難矣。嗚呼。豈非命  
哉。是時吾母還蘇村。居鄉得謙之信。即令僕人關純  
往迎出。港澳家人震驚相對泣。二婢決力勸母行。十



二日。關純偕一女僕。護老母出城。十三夕。由城下香港。關純過薩畏。謂不當坐上艙。乃坐下艙。坐客繁多。竟夕無卧處。又雜稠人中。言語穢惡。氣味腥膻。吾母屏氣不敢語言。不敢屑涕。皆生平未嘗經此者。至港入鴻安客棧。而不知吾家人所在。十四日。關純復還城查問。乃知過澳門。十四夕。關純還港。十五晨。護老

母過澳則知吾還港十六日復來港相見然老母生  
平寡出必有子孫從又未嘗居客棧當患難憂驚  
到港無歸僅與一女僕相對隱泣吞聲悽惶萬狀既  
見告知為不孝未能救天下幾危老母雖天幸得全  
而貽以大憂不孝之罪上通於天矣弟婦及同荷亦  
於翌日來澳時風聲傳播奸人生心親戚多被擄挾

者。吾舅遂為奸究所脅。索千金而後得還。吾二姊四  
妹託于妯娌高樓深室。每夕一遷。父母妻三族人凡  
數十。並皆走避。而望門投止。或多見拒者。甚至吾鄉  
六姓及吾鄰鄉良登鄉並皆駭逃。數十萬戶村落皆  
空。十一日。封吾花塿之屋。波及吾從叔中丞第及其  
園田二頃。盡皆抄沒。於是中丞公之業盡矣。十二日。

封雲衡書屋。吾所藏之書及所著書稿盡失矣。十八日。還吾蘇村鄉。封去二屋一廳。事及高祖炳堂公祠廟。二十二日。封萬本草堂。以吾所藏及書藏書三百餘箱盡付一炬。所著行之書亦已行各省燬版矣。封吾家周鄉叔父之屋及祠。而卓如之鄉亦於十七日被圍。鄉人咸走避。捕其遠族一孕婦墮孕而死。嗚呼。

慘哉。姊妹久不至。復遣關純往迎之。並踰垣迎先人  
木主來澳。關純言吾鄉空巷慘懷。戶無炊煙。蓋弥月  
焉。當吾家之才移而吾母之未出也。何曉生於八月  
託陳欣榮至城迎吾家。梁鐵君請於英廣州領事。用  
小輪入鄉迎吾母。雖皆先去。而俠士高義。令人感泣。  
吾二十一日移居何曉生家。港澳賃屋薪水。皆何穗

田供給。周入隱微。何曉生復金數千。以安羈旅。藉以  
濟宗族及供游貲焉。二何君今之俠士。義高海內。何  
可復得哉。當十四夕。吾到港也。英人前海軍卿柏麗  
輝亦適到。約見慷慨。新救我皇上。我告俄人屯兵旅  
順者二萬。貴國未易輕舉也。柏海軍卿指額誓死以  
救我皇上。蓋雄才熱血。不可多得之人也。時日本

宇佐穩來彦偕領事上野季次郎來見以大隈伯在  
相位有志營東亞先欲至日本求救隈伯電訴保護  
速之來先是日人宮崎寅藏託梁鉄君來送金二千  
卻之日本諸士皆好義周旋懇摯故以九月五日東  
渡乃議游歐美焉在港凡二十日日日憂君親之亡  
哀家族之危聞捕殺之信李蕊園張樵野之見流孫

子靖之下獄宋芝棟陳寶箴父子及江建霞熊秉三  
王錫蕃李孟符張菊生之被革文芸閣黃公度之被  
捕日接於耳目聞公度以我捕慮其必死雷英領事  
救焉而為日人救之乃為領手焉其他復八股禁報  
館捕會社及主筆人罷經濟特科農工商局復冗官  
停漕折務反其舊凡昔所經營者盡皆罷廢詩無逝



我梁無咎我苟我躬不閱違恤我後既丁此厄一身  
不自保復計其他哉久而聞幼博及五子之難益令  
哀惻肝肺矣維新之事吾以四月二十八日召見至  
七月二十九日奉密旨凡九十日是役也身冒十死  
思以救中國而竟不克豈非天哉事後追無一生理  
吾先出上海辦報則上海摘捕立死皇上無明詔密

詔之教促遲遲出京必死榮祿早發一日無論在京  
在途必死無黃仲弢之告宿天津必死從仲弢之言  
烟台亦必死搭招商局之海晏船英人欲救無從必  
死是日無重慶之輪開或稍遲數時行追及必死飛  
鷹快船不因煤乏遲必死萊青道非因有事往膠州  
則在烟台必死上海道不託英人搜則英領事不知

無從救必死。英人不救亦必死。凡此十一死得救其  
一二而無所濟。而曲線巧奇曲曲生之。留吾身以有  
待。其茲中國不亡而大道未絕耶。聚散成毀皆客感  
客形。深閔死生順天俟命。但行吾不忍之心。以救此  
方民耳。諸子欲聞吾行事。請吾書此。此四十年乎。當  
地球文明之運。中外相通之時。諸教並出。新理大發。

之日吾以一身備中原師友之傳當中國政變之事  
為四千年未有之會而窮理創義立事變法吾皆遭  
逢其會而自為之學道救人足為一世生本無涯道  
終未濟今已死耶則已閱徧人天亦自無礙即作如  
是觀也後此玩心神明更馳新義即作斷想又為一  
生觀也九月十二日至日本居東京已三月歲暮書

於牛込區早稻田四十二番之明夏閣